

1. Ju Dios navi ju lacat'un chai ju t'iyán

(maxtucanta ju laca Génesis 1:1–2:4)

Pus ju mak'anchich lana mati' tu'u' ixjunita. Pus mati' ixjunita ju talhpa nin k'aixcan nin alama nin ach'ananti. Pus vachu' mati' ixjunita ju atapacxat nin yuchi ju lapanac. Chai ju t'iyán jantu ixtasui nin yuchi ju avilhchan. Chai vachu' mati' ixjunita ju malhquiuyu' nin yuchi ju lacst'acu. Para ju Dios ixt'ajunch.

Pus ju acsnich ju Dios pastaclich ixnavica ju lacat'un chai ju t'iyán. Pus chunchach ju xanavi. Pus ju ixputai'ulacan lana k'ox ixputs'ista ju lacat'un chai lana mati' tu'u' ixjunita. Pus lana va si xcan ju ixlacapuch'apak'ojuta ju lacat'un. Para ju ix'Espiritu ju Dios ixtalacnavich ju la'ix'ucxni ju xcan.

Yuch ju tuchi navi ju p'ulhnan avilhchan ju Dios

Pus ju acsnich ju Dios naulich ni catalacasulh ju atuncunu'. Chai ju atuncunu' lana talacasu. Pus chunchach ju punavilhch ju atuncunu' chai ju atats'is.

Yuch ju navilhch ju ixlhilakat'ui avilhchan

Pus ju astanch, navilhch ni cata'akst'alhch ju ali' xcan tus lact'iyán. Pus ju ani lhich'alheat ixlhilakat'uich avilhchan ju punavi.

Yuch ju navilhch ju ixlhilakat'utu avilhchan

Pus ju ixlhilakat'utuch avilhchan, malakxtinulhch ju alama ju la'ix'ucxni ju lacat'un. Chai naulich ni cat'ak'ayalhch ju ach'itin chai ju lajq'uiu ju la'ix'ucxni ju lacat'un. Pus vachu' naulh ni na lhu caxt'ak'a' xatoc'at chai xat'in ju ak'atamin q'uiu chai ju tijtamin ach'ananti. Pus ju chunch na lhuch lajq'uiu chai lac'ach'ananti ca'alina' ju sich ixt'achunch cajuna'. Pus ju Dios lakts'ilh ni lana k'ox c'us ju tuchi ixnavita.

Yuch ju navilhch ju ixlhilakat'at'i avilhchan

Pus ju ixlhilakat'at'i avilhchan navilhch ju avilhchan, malhquiyu' chai ju lacst'acu. Chai lacmuc'alhch ju lact'iyani ni laich catamalacasu ju atuncunu' chai ju atats'is. Chai vachu' navi ju lhi'asnin chai ju lhi'ich. Pus ju Dios lakts'ilh ni lana k'ox c'us ju tuchi ixnavita.

Yuch ju navilhch ju ixlhilakaquis avilhchan

Pus ju ixlhilakaquis avilhchan alacnavi ju ts'oknin chai chux ju atapacxat ju tat'ajun lacxcan. Pus ju aecnich lakts'ilh ni lana k'ox c'us ju tuchi ixnavita. Chai alacjunilhch ju lac'atapacxat ju tat'ajun ju lacxcan chai ju ts'oknin ni na lhu catamak'ampup'ak'atnalh. Pus ni ixlhuch'an catajuna' laich catalacaputoc'ak'o ju lacat'un.



Navicalh ju pamata'

Yuch ju navilhch ju ixlhilakachaxan avilhchan

Pus ju ixlhilakachaxan avilhchan alacnavik'o chux ju lac'atapacxat ju tat'ajun ju la'ix'ucxni ju lacat'un. Pus

navilhch ju atapacxat ju va talactatanxak'ai chai ju na k'ai talacjunita. Chai vachu' navi ju lai laclhistajcan ju lacalacchaka'. Chai ju yu'unch atapacxat vachu' va tats'iq'ui acsni tatsucui. Chai ju acsni avilhchan vachu' navi ju lapanac. Pus ju yuchi malhistacni ju lacat'un. Chai vachu' junilh ni yuchi ju ca'alhist'ac'a' chux ju lac'atapacxat.

Pus navi pumatam jok'at chai pumatam chak'o'ulh. Pus ju yu'unch tachi ju Dios ixtajunita . Pus mati' atumpa atapacxat ju ixt'achuncha'an cava. Chai alacjunilh ni va lakputam catatama. Pus na lhu ix'ask'at'an'an cata'alina'. Chai ju ix'ask'at'an'an laich cata'ana' tolhnin ixlhilacaputs'un ju lacamunutpa'. Chai vachu' alacjunilh ni laich cata'ulh chux ju ach'ananti ju alin ju laich ucan. Pus ju Dios lakts'ilh ni si k'ox chux ju tuchi ixnavita.

Ju ixlhilakaturjun avilhchan astacnalh ju Dios

Pus ju ixlhilakachaxan avilhchan atok'oxana', ixnavik'ojutach ju lacat'un chai ju t'iyen. Chai ixt'anavik'ojutach chux ju taxtokni ju alin. Chai ju ixlhilakaturjunch avilhchan astacnalhch ju Dios. Pus ju acsnich naulich ni tamch cajuna' ju ixlhilakaturjun avilhchan ju semana.

2. Ju Dios navi ju p'ulhnan jok'at chai ju p'ulhnan chako'ulh

(maxtucanta ju lacaGénesis 2:5-25)

Pus ju p'ulhnan lapanac navi ju Dios, t'un ju lhinavi. Chai acsni xtaknilh ju ix'atsucunti va la'ixlhixin ju sununilh.

Chai ju acsnich navilhch lakatam puxanti junta na c'usich ixjunita. Pus ju anch puxanti Edén ixjuncan, chai junilh ni anchach ju catola' ju lapanac. Chai vachu' junilh ni yuchach ju calhich'alhcatnana' ju puxanti. Chai ju chunch k'oxich calhist'ac'a'.

Pus vachu' junilh ni laich ca'ulh chux ju lhi'ut ju alin ju lacapuxanti. Para junilh ni vi k'elhtam lhi'ut ju jantu lai cati'ulh. Pus ju yuchi lhi'ut ni ucan lai puc'atsacan tasmalhch ju jantu k'ox chai tasmalhch ju k'ox. Pus ju Dios junilh ju lapanac ni ca'ulh ju yuchi lhi'ut caniya'.

Ju Dios navi ju chako'ulh

Pus ju acsnich ju Dios pastaclich ni maktasq'uini ixmacuvilan ju jok'at. Chai ni laich ca'aklhtaiju ju ixmacuvilan. Pus ju acsnich alaahiminik'o chux ju lac'atapacxat junta ixvi. Pus chunch ju xanavi ni laich ca'alac'ulanilh ju ixlactapaka'ut ju tijtamin atapacxat. Para jantu tu'u' atapacxat lai xalhitajui ju laich cat'ala'aklhtaiju.

Pus ju lakatam avilhchan ju Dios lana k'ox malhtata ju lapanac. Chai ju acsnich maxtunilh lakatam ixcustiru. Pus yuchach ju punavilhch ju chako'ulh. Chai acsni kujlich ju



*Ju jok'at chai ju chako'ulh tat'avilanalh
ju lacapuxanti ju lac'atapacxat*

jok'at malacasunilhch ju ixmacuvilan. Pus ju lapanac lanach k'ox lhek'achalh acsni lakts'ilh ju chako'ulh chai naulich:

—Pus ju uxint'i quinlacetuna ju xap'unavic'an. Pus yuchi chako'ulh aclhimapak'a'uyan. Pus ju uxint'i la'ixlacetuna jok'at ju xat'axt'ui.

Pus tus ascnich ju jok'atni talacmacajun ju ixlacpai'an acsni talactamak'axt'ok'a. Chai va lakatamch lacatuna tat'ajun ju ixlac'amachaka'an.

Pus ju acsnich avilhchan ju jok'at chai ju chako'ulh va lack'aimasni'un ixtat'ajun. Para ju yu'unch lana jantu ixtamispai ju maxanti.

3. Ju p'ulhnan lapanacni tamalac la ju ixchivinti Dios

(maxtucanta ju lacaGénesis 3)

Pus ju p'ulhnan lapanacni lacapuxanti ju ixtavilanalh. Chai ju yuchi puxanti lanach va c'us ixnavita ju Dios. Pus ju lu lana k'ox lai ix'a'okxchok'onun. Para ju ali' atapacxat ixnavita ju Dios palai jantu ixta'a'okxchok'onun.



Ju lu okxchok'oi ju chako'ulh

Ju lu okxchok'oi ju chako'ulh

Pus ju lakatam avilhchan ju lu tailajk'alh ju chako'ulh chai chinich junilh:

—Pus tajunan'as ju Dios ni jantu a'ut'it ju lhi'ut ju alin ju lacapuxanti.

Pus ju chako'ulh chinich lhimapusp'itnilh:

—Pus lai ac'uyau chux ju xatoc'at ju q'uiiu ju alin ju lacapuxanti. Para ju k'elhtam lhi'ut ju ch'ancanta la'ixlacaitat jantu lai acti'u. Pus ju Dios quintajunin ni lai aclhiniu acsni ac'u u mas va yuchi ni aclacach'apau ju xatoc'at.

Pus ju lu ni na va ix'okxchok'oputunch, junilhch:

—Pus ju uxitnan jantu at'init'it. Pus ju Dios c'atsai ni a'uya'it'it ju yuchi lhi'ut, chunch a'una'it'it tachi ju yuchi. Pus ju acsnich ac'ats'aya'it'it tasmalhch ju k'ox chai tasmalhch ju jantu k'ox.

Ju Adan chai ju Eva tamalacla ju ixlhamap'aksin Dios

Pus ju chako'ulh navinilh cuenta ju tuchi xajuni ju lu. Pus ju acsnich lakts'ilhch ju xatoc'at ju anu' q'uiiu. Pus lanach k'ox



Ju jok'at chai ju chako'ulh tatatank'anuni ju Dios

c'us lhiula. Chai pastaclich ni lana k'ox ca can ju ix'uca. Chai vachuch na k'ox lhiula ni ixt'achunchach cava ju Dios.

Pus p'uxlich lakatam xatoc'at ju anu' q'uiu. Chai ulhch. Pus ju acsnich lhi'anihch vachu' ju yuchi lhi'ut ju ixpapa chai ju yuchi vachuch ulh. Pus ju acsnich tanavilh cuenta ni va lack'aimasni'un ixtat'ajun. Chai sok'och alaclhilak'axt'akcalh ju xaxk'oi higuera.

Pus acsni tsuculhch tok'oxana' chai ni ca'anantach ju avilhchan, tak'esmatlich ju ixchivinti Dios ju lacapuxanti. Para ju acsni ixtatalhonich ixt'alapakxtokca ju Dios. Pus va talactatank'anulhch ju acsni.

Ju Dios alacsacmich ju Adan chai ju Eva

Pus ju acsnich sacmilh ju jok'at ju Dios:

—Tas anchach ju vilht'i.

Pus ju jok'at chinich lhek'elhtailh ju Dios:

—Pus ick'esmatli ju minchivinti acsni xaq'uinxe'elai ju lacapuxanti. Para ni va ictalhoniyanch ni va ick'aimasniuch, pus va ictatank'anulhch.

Pus ju acsnich ju Dios junilhch:

—Pus jantu xamati' xajunan ni va k'aimasniu'at. Ja va ut'i ju xalhi'ut ju q'uiu ju xaclhek'aitan. Pus ni jantu ix'ut'i ju xalhi'ut, jantu ixt'inavit'i cuenta tas unit'ach.

Pus ju acsnich naulich ju lapanac:

—Pus ju chako'ulh ju xaq'uinxt'akni yuchi ju xaquinxtakni ju lhi'ut. Pus ju quit'in ic'ulhch ni xacxtaknicanch.

Pus ju acsnich ju Dios sacmilhch ju chako'ulh tijuch ju ixnavita. Chai ju yuchi chinich lhe'ak'elhtayanalh:

—Pus yuchi ju lu ju xaquin'okxchok'oi. Chai ixlhiyuchach xalhi'uich ju lhi'ut.

Ju Dios alacmamak'alhk'ajni ju alactu'unin

Chai ju acsnich ju Dios alaclhca'ulanilhch ju ixmak'alhk'ajnat'an ixchux'an. Pus tus acsnich ju junicalh ju lu ni va catatanxak'a'alhtananach. Chai vachu' junicalh ju ixlacmakp'u ni va catalacts'ants'ac'aputunach ju ixlacmakp'u ju chako'ulh. Chai ju ixlacmakp'u ju chako'ulh va la'ix'aktsulh ju catapumakniya' ju lu.

Pus ju chako'ulh junilh ni na camak'alhk'ajnana' acsni camaklok'ona' ju ix'ask'at'a. Chai junicalh vachu' ni ixpapa ju calhijuna'.

Pus ju jok'at junilh ni jantu k'ox ixnavita ni va ixquiclaca'itach ju ix'amachaka' chai ixlacata ni va ix'utach ju lhi'ut. Pus tus acsnich avilhchan ju junicalh ni na p'as cach'alhcatnana' ni laich calhitaju ju ixvaiti. Pus ju lacat'un na lhuch cap'una' ju alhtucun chai ju lac'ach'itinch ju jantuch lai ucan.

Chai vachu' junilh ni va t'un lhinavicanta ju ixlacatuna. Chai ju yuchi ni catapapayach caniyach. Pus acsni caniyach t'unch cajunchokoya' ju ixlacatuna.

Pus ju acsnich ju jok'at Adán ixjuncan. Chai ju Adán va nomputunch t'un. Chai ju ix'amachaka' Eva lhimapaka'u. Pus ju Eva va nomputun atsucunti. Pus yuchach ju xanatich cajuna' chux ju lapanacni ju catatsucuya' astan.



*Alacmxtucan ju lacapuxanti chai tatayai
ju anquilhnin junta putanucan*

**Ju Dios alacmaxtuh ju lacapuxanti
ju Adan chai ju Eva**

Pus ju Dios alacnavinilh ju ixlacpumpu'an ju Adán chai ju Eva. Chai ju yuchi pumpu' si ixlac'axt'ak'an atapacxat ju punavi. Para ju acsnich alacmaxtuhch ju lacac'usi puxanti. Pus ju yuchi jantu lacaq'uilh ni cata'ulh ju xalhi'ut ju q'uiju ju lai cataputsucuk'alhi. Pus ju yuchi lhi'ut ixch'anta ju Dios ju lacapuxanti. Chai vanin ixch'anta junta lacya ju ali' lhi'ut.

Pus ju acsnich ju Dios amalakachachilhch ju xa'anquilhnin lact'iyán. Chai ju yu'unchach va catalhist'ac'ach junta putanucan ju lacapuxanti. Pus ju chunch jantuch lai catitatanu ju jok'at chai ju chako'ulh. Pus jantuch lai catita'ulh ju xalhi'ut ju q'uiju ju atsucunti jonk'alhita.

4. Ju Adán chai ju Eva ta'alilh ju ix'ask'at'a'an

(maxtucanta ju lacaGénesis 4–5)

Tatsucui ju Caín chai ju Abel

Pus ju Adán t'atama ju ix'amachaka' juncan Eva. Pus ju yuchi ak'ainalh chai alilh pumatam ists'alh. Pus ju yuchi ask'at'a lhimapaka'ucalh Caín. Pus jantuch mak'an va aktam ak'ainanchokopa ju yuchi. Chai ju acsnich ask'at'a maklak'aulh lhimapacutucalhch Abel.

Ju Caín chai ju Abel talaclasa

Pus acsni k'aya lapanacch va ju Caín va cuxtulapanacch junlh. Para ju Abel ixlhista'calhnilu va.

Pus ju lakatam avilhchan ju ixt'iyun'an tapastaclich ixtaknica lakatam lhak'ailakts'inti ju Dios. Pus ju Caín lhiminilh ju lhi'ut chai ju xat'inch ju tuchi ixlacch'anch. Para ju Abel ixlajcalhniluch ju lacmakni. Pus ixt'iyunch'an ju talhijunilh ju Dios ju lhak'ailakts'inti.

Pus ju Dios lana k'ox c'us lhiula ju ixlhak'ailakts'inti ju Abel. Para ju ixlhak'ailakts'inti ju Caín jantu chunch lakts'ilh. Pus ju acsnich ju Caín lanach k'ox talhk'amalh.



*...Ju Caín chai ju Abel taxtakni
ju ixlhak'ailakts'inti'an ju Dios*

Para ju Dios junilh ni jantu k'ox ni va catalhk'amalh. Pus ni canavilhch ju k'ox, vachu' lhek'ach cat'alalakts'ina' ju yuchi. Chai vachu' junilh ni jantu canavi ju k'ox lai capastaclh ixnavica ju amacxcai. Para ju Caín lana jantu xak'esmatputun ju chunch chivinti.

Pus ju lakatam avilhchan ju Caín junilh ju Abel:

—Ca'au pixiyalhnin ju lacacuxtu.

Pus acsni ixtayananchalhch ju lacacuxtu ju Caín sok'o makni ju ixp'isek'e.

Ju Dios mamak'alhk'ajni ju Caín

Para ju Dios lana jantu k'ox lhiula ju tuchi xanavi ju Caín chai lhisacmilhch:

—Tas anchach ju t'ajun ju mimp'isek'e.

Pus ju Caín ta'eklhtama ak'elhtayanalhch:

—Pus ju quit'in jantu ijc'atsai. Chai jantu va iclhistact'ajun.

Para ju Dios junilh:

—Pus lana k'ox amacxcai ju tuchi xanavi. Pus ijc'atsai ni va maknit'i ju mimp'isek'e. Pus ju chavai lana k'ox amak'alhk'ajnana' acsni alhich'alhc'atnana' ju lacat'un. Pus



Ju Caín makni ju ixp'isek'e

lana va lacats'unin ju a'iya' ju xatoc'at ju min'ach'ananti. Chai lanach k'ox makat ju a'ucxup'ina' minch'alhcatnat. Jantuch va ani.

Pus ju Caín junilh ju Dios ni jantu lai catich'ixk'o chux ju ani mak'alhk'ajnat. Chai naulh ni na ixtalhanan ni va lai tamakni acsni catalhita. Pus ju acsnich ju Dios ixlhiyuchach lhi'ulanilhch lakatam ixpumispacan ju Caín. Pus ju chunch jantuch xamati' catimakni acsni catalhitaju.

Pus ju acsnich alhch tsucunu' junta na makatch lacat'un. Pus acsni tamak'axtokchalhch alilhch pumatam ists'alh. Chai ju yuchi lhimapaka'ulh Enoc. Pus ju astanch navilhch lakatam lak'achak'an junta laich catatavi.

Pus ju Enoc vachu' alilh pumatam ists'alh. Chai acsni mak'anch va ju Caín na lhuch alilh ju ixlac'apapanatni. Pus ju ali'in ixlhiyu'unch ixlhistacnin calhnilu tava, ju ali'in asanin chai ju ali'in si tsasnat talhich'alhcatnalh.

Tsucui ju Set ists'alh ju Adan chai ju Eva

Pus ju Adán chai ju Eva na ixtalhamak'aninintach ni va ixnitach ju Abel. Pus ju astanch alinchokolh ju ists'alh ju lhimapaka'ulhch Set. Pus acsni tamak'axtoklich ju yuchi alilhch vachu' pumatam ists'alh. Chai ju yuchi lhimapaka'ulhch Enós. Pus ju Enós chai ju ix'ask'at'an yu'unchach ju tatai'ula ixt'achivininca ju Dios.

Pus ju pumatamch ixuniya papanti ixjunita ju Enós yuchach ju Enoc. Pus ju Enoc vatach quiclaca'ilhch ju ixlhamap'aksin ju Dios. Pus ju Dios ixlhiyuchach jantuch lhimoconilh ni canilh. Pus lana va lok'ontilhi'alh chai jantuch tavanan xamati' xalakts'inchokoi.

Pus ju xak'ai ists'alh ju Enoc ixjuncan Matusalén chai ju yuchi nilh acsni ixpacxantach ju 969 c'ata. Chai ju pumatam ixpapanti ju Matusalén yuchach ju Noé ixjuncan.

5. Ju Dios macamilh ju k'ai akmuctuti ju ixpulak'alhican ju lacamunutpa'

(maxtucanta ju lacaGénesis 6–9)

Pus ju acsnich c'ata ju Dios alakts'ilh ju lapanacni ni na ixtat'ajunch navinin ju alactu'unti. Pus ju yu'unch lapanacni anich lacat'un ju ixtavilanalh. Pus ju yu'unch ixtapast'ac'a ixtailhi'anca ixnavica ju amacxai taxtokni.

Pus ju acsnich ju Dios astaninch ixnajun ni va ixnavitach ju lapanac. Chai ju acsnich naulich ni ca'amalajc'acxachokoyach. Chai vachuch ju atapacxat ca'amalajc'acxak'oya'.

Pus ju pumatam lapanac juncan Noé, va xaman yuchi ju k'ox lapanac ixjunita ju ani lacat'un. Chai ju yuchi vatach ixquiclaca'ich ju Dios. Para ju yuchi pumat'utu ixts'alan ixpacxanta. Chai ju yu'unch ix'ajuncan Sem, Cam chai Jafet.

Ju Dios manavini lakatam barcu ju Noé

Para ju lakatam avilhchan ju Dios junilh ju Noé:

—Pus lanach k'ox xac'alakts'in ni lana k'ox k'ai talajcunita ju xalapanacni ju ani lacat'un. Pus ixlhiyuchach ac'alac'himac'acxak'oyach.

'Pus iclacasq'uin ni anavit'i lakatam k'ai barco ji Noé. Para ju yuchi barco si q'uiu ju ap'unaviya' chai alhilac'ap'axaya' ju brea juncan. Pus ju chunch jantuch catilacatanu ju xcan. Pus ju yuchi barco lana k'ox k'ai anaviya' tachi ju laich lhu catanucalh. Para ju la'ix'aksti' akxt'ak'a'i. Chai anaviya' lakatam xamalhtich. Chai ju ixpulacni pulaclhu anaviya' tachu laich tijlhu catatanu.

'Pus ju quit'in acmacamina' lakatam k'ai akmuxtuti ju ca'amalajc'acxak'oya' chux ju lapanacni chai ju lac'atapacxat.

'Para ju uxint'i alin ju tuchi aclhit'atak'oxiyan. Pus ju uxint'i chai ju mints'alan chai chux ju ixlac'amachakan alact'at'anuya' ju lacabarco.

'Chai vachu' amanuya' lacts'unin ju tijtamin atapacxat ju alin. Pus ju tach'ant'at'in chai ju va talactatanxak'a'alhtananch alact'amanuya'ich ju ts'oknin. Pus ju laich ucan chai ju laich aquinlaxtakniu tach lhak'ailakts'in quilhmac'ujunanch amanuya'. Para ju jantuch lai ucan va quilhmac'taminch ju alacmanuya'.

'Chai amanuya'it'it vachu' ju minvaiti'an chai ju ixvaitich'an ju lac'atapacxat. Pus ju uxijnan jantu t'a'at'it'ap'asat'it ju ixpulacni ju lacabarco. Pus jantu catitamalajc'acxan ju akmuxtuti.

Pus ju Noé navik'o chux ju tuchi lhijunilh ju Dios ni canavi.

Ju Dios macamilh ju akmuxtuti

Pus acsni navik'o ju barco ju Dios junilh ni ca'at'atanulhch ju ixlapanacni chai ju lac'atapacxat. Pus ju Noé, ix'amachakach chai ju pumat'utuch ixts'alan chai ju ix'aput'inch tatanulhch ju lacabarco. Pus k'extamch tat'atanu ju lac'atapacxat.

Chai ju astanch ju Dios malacchaulich ju xamalhtich ju barco. Pus ju acsnich avilhchan ju Noé ixpacxantach ju lakachaxan cientos c'ata.

Chai ju acsnich ju Dios macamilhch ju k'olhanaxcan. Pus lana k'ox p'as tamachilh ju xcan t'up'uxam avilhchan. Chai tantacu chai tantats'is ju ixtamayachilh. Pus ju acsnich



Ju lac'atapacxat tatanui ju lacabarco

vaclhunch ju ixlacta'acxtui ju xcan. Chai lana lacapuch'apak'o ju lacat'un. Pus ju acsnich ju barco tsuculhch ta'akst'ana' ju la'ix'uexni ju xcan. Pus ju xcan lana akxt'akmak'o chux ju talhpa.

Chai ju lapanacni lana tanik'o chux ju ixtat'ajun ju lacamunutpa'. Chai vachu' tanik'o chux ju atapacxat ju

tach'ant'at'in ixtajunita, chai ju va talactatanxak'a'alhtanan chai ju ts'oknin. Para ju Noé chai ju ixlapanacni tatak'elhtaxtulh ju lacabarco. Chai vachu' ju lac'atapacxat ju ixtat'atajumanalh tatak'elhtaxtok'o.

Pus acsni tapasalhch ju ciento cincuenta avilhchan, ju Dios tsucuchokolhch maxixini' ju xcan. Para ju barco anch astacnalhch la'ix'ucxni junta lana k'ox putank'ai ju talhpa. Para ju xcan palaich makat ju tantavi.

Pus ju acsnich ju Noé maklhtek'alhch lakatam xaventana ju barco. Chai ju acsnich maca'alhch lakatam ts'ok'o ju juncan cuervo. Pus ju yuchi va ixpuc'atsacanch ni xixtach ju xcan. Para ju yuchi ts'ok'o jantuch tasp'itcha.

Pus acsni tapasachokolhch a tam semana maca'alhch alakatam lak'axk'avan. Para ju yuchi tasp'itchochocha ni na ix'alinea' ju xcan ju la'ix'ucxni ju lacat'un. Chai acsni tapasachokopa alakatam semana maca'anchokopa ju lak'axk'avan. Pus ju acsnich ju lak'axk'avan lhichinchalhch akxtam xaxk'oi ju juncan olivo ju la'ixquicchupi. Pus acsni tapasachokopa a tam semana maca'anchokopa ju lak'axk'avan. Para ju ixlhipakt'utuch maca'ancanta jantuch tasp'itcha.

Chai chunchach ju puc'atsalhch ju Noé ni ixixtach ju lacat'un. Pus ju acsnich maklhtek'alh ju xamalhtich chai talacxtulhch. Para titamacaulh ali' semana ju la'ixpulacni ju barco.

Ju ix'ask'at'an ju Noé tataxtuchokoi ju lacabarcu

Pus ixtapasatach tam c'ata ju ixtatanumanalh ju Noé ju lacabarco. Chai ju Dios junilhch ni ca'alact'ataxtulhch ju ixlapanacni chai ju lac'atapacxatch. Chai ju Dios alacjunilhch ni catalact'atamalh ju pumatamin ju ixlac'amachaka'an. Pus ju chunch na lhuch catalac'alina' ju ixlac'ask'at'a'an. Chai ju yu'unch laich catatolhchokoya' ju lacamunutpa'.

Pus acsni tataxtok'o ju lacabarco ju Noé navi lakatam ixpulak'ayacan ju Dios ju si chiux. Pus ju acsnich lacch'apalh ju lac'atapacxat. Chai lact'ach'apalhch ju ts'ok'o ju laich lhixtakcan lhak'ailakts'inti. Chai acsni lakmaknik'o lakxava ju xalhivai. Pus la'ix'ucxni ju ixpulak'ayacan ju Dios ju lakxava ju anu' lhak'ailakts'inti.

Pus ju Dios lana k'ox k'achanilh ju ixlhak'ailakts'inti ju Noé. Chai k'elhtasunilh ni jantuch tavanan chunch catimalajc'acxachokolh ju lapanacni acsni tuncujuntaca' ju lacamunutpa'. Pus jantu cati'alinchokolh ju chunch akmuxtuti mas na k'ai junita catava ju lapanacni.

Pus ju Dios junilh ju Noé ni tus acsnich ju na catatalhoniya' ju lapanacni ju lac'atapacxat. Pus ju acsnich ju lapanacni laich cata'ulh ju xalhivai atapacxat. Para ju ix'ac'alhni ju atapacxat jantu lai catita'ulh. Pus ju Dios vachu' junilh ju lapanac:

—Pus ju lapanac u atapacxat ju camakni ju lapanac vachu' camaknicana'. Pus ju chunch va xpumamak'alhk'ajnicanch ju tuchi navita.

Chai ju Dios vachu' k'elhtasunilh ju Noé ni jantuch tavanan cati'amalajc'acxachokolh ju ixlacmakp'u nin yuchi ju lac'atapacxat.

Pus ju acsnich ju Dios malacasulh ju quilhmacchat ju lact'iyán. Chai ju yuchi va xpumalacasucanch ni ixtavasalantich ju tuchi ixnajun.



Ju lapanacni talakts'in ju quilhmacchat ju lact'iyán

6. Ju Dios navi ju lapanacni ni catachivinilh tijtamin chivinti

(maxtucanta ju lacaGénesis 11:1-9)

Pus ju mak'anchich va tijtam chivinti ixtachivinin ju lapanacni. Pus acsni na lhuch tava ju lapanacni na k'aich va ju lak'achak'an. Chai ju yu'unch ixtavilanalh ju xalacat'un juncan Sinar.

Pus ju anchach lacat'un tapastaclich ju lapanacni ixnavica ak'atam chaka' ju na putank'aich cava. Chai ju yuchi chaka' laich catalhicha'alh ju ixlhiputank'ai tus lact'iyen.



Ju lapanacni tayajui ju putank'ai chaka'

Pus ju xatapunavich chunch yuchi ni na va atalanininch ixtalhitalacasuputun. Chai ni va jantuch ixtata'akpitsiputun ju ixlhilacaputs'un ju lacamunutpa'. Pus ju yu'unch va lakputamch ixtalactolhputun.

Para ju Dios jantu xak'achani ju tuchi ixtat'ajun navinin. Chai ju acsnich alaclak'alhinilhch ju ixchivinti'an. Pus ju

acsnich sich tijtamin chivinti ju tachivinilh. Pus ju chunch jantuch lai talamachakxanilh ju ixchivinti'an ju pumatamin.

Pus chunchach ju alacpumakpitsilh ju Dios ju lapanacni ixlhilacaputs'un ju lacamunutpa'. Pus ju lacat'un junta ixtatai'ulatach ixyajuca ju putank'ai chaka' lhimapacutucalhch Babel.

7. Pus ju Dios t'asanilh ju Abram ni cach'alhcatnanilh

(maxtucanta ju lacaGénesis 11:10–12:20)

Pus ju Sem ists'alh ixjunita ju Noé. Chai ju yuchi ix'alin pumatam ixpapanti ju ixjuncan Taré. Pus ju yuchi lapanac ix'alin pumat'utu ists'alan. Chai ju yu'unch chini ix'ajuncan: Abram, Nacor chai Harán. Chai ju yu'unch xalak'achak'an Ur ju ixtavilanalh.

Pus ju Harán alilh pumatam ists'alh ju lhimapaka'u Lot. Pus acsni jantuch mak'an va nilhch ju Harán.

Pus ju acsnich ju Taré alacmaxtulhch ju Abram chai ju Lot ju xalak'achak'an Ur. Chai anch alaclhi'alhch ju xalacat'un juncan Canaán. Para va anch ju alact'acha'alh ju xalak'achak'an Harán. Chai anchach ju tak'achanilh ixtolaca. Chai anchach ju nilh ju Taré.

Para ju Abram ixt'amak'axt'ok'a pumatam chako'ulh ju juncan Sarai. Para ju yuchi jantu lai ix'alin ju ix'ask'at'a.

Ju Dios junilh ju Abram ni ca'alh ju Canaan

Para acsni ixtavilanalhca' ju Harán, ju Dios junilh ju Abram:

—Pus alacmac'auch ju minlhi'alak'avin chai ju minlaclacat'unch. Chai ap'ina'ich ju xalacat'un junta acmasuniyan. Pus ju anch lana k'ox lhu cata'alinanta ju minlac'apapanatni. Chai ju anch lana k'ox ac'aklhtaijutachan.

'Pus vachu' na k'ox ac'alakts'ina' ju lapanacni ju k'ox catat'alalhi'anan. Para ju jantu k'ox catalakts'inan vachu' ac'alacmamak'alhk'ajniya'. Pus ju va ix'amapainica ju min'apapanatni na k'ox ac'alakts'ina' ju lapanacni ixlhilacaputs'un ju lacamunutpa'.

'Pus ju Abram quiclaca'i ju Dios. Chai taxtulh ju xalak'achak'an Harán. Pus ju acsnich ixpacxantach ju 75 c'ata ju Abram. Pus alacchi'alh ju ix'amachaka' juncan Sarai chai ju ixpuxlimtich juncan Lot. Chai vachu' alact'alhi'alh ju ixlapanacni chai chux ju ixlactaxtokni. Pus acsni tataxtulhch ju Harán ta'alh ju Canaán.



Ju Abram taxtui ju la'ixt'un

Ju Abram cha'alh ju Canaan

Pus acsni tacha'alhch ju Canaan alaclhitajulhch ni ixtavilanalh anch ju cananeonin. Chai ju yu'unch lapanacni ix'apapanatni ixtajunita ju Cam, ists'alh ju Noé. Para ju Abram va anch cha'alh ju xalak'achak'an juncan Siquem. Pus ju anch ix'alin junta ixtalak'ayai ju Dios ju lapanacni.

Pus ju anch lacat'un ju Dios junilh ju Abram:

—Pus ju ani lacat'un min'apapanatni ju ac'alakxtakniya'.

Pus ju anch navilh ju Abram lakatam ixpulkan'ayacan ju Dios. Chai tailhi'anchokolhch ju ix'alhtanti tus acsni cha'alhch vanin ju xalacat'un Betel. Chai ju anch navichokopa alakatam ixpulkan'ayacan ju Dios. Pus ju astanch tailhi'anchokopa ju ix'alhtanti ju Abram tus ni cha'alhch ju xalacat'un juncan El Neguev.

Para ju acsni c'ata ju anch lana k'ox ix'alin ju chavan. Pus ixlhiyuchach lhi'alhch ju xalak'achak'an Egipto. Para acsni alinchokolhch ju vaiti anchokolhch tolhna' ju xalacat'un El Neguev.

8. Ju Abram chai ju Lot tatalakpitsi

(maxtucanta ju lacaGénesis 13)

Pus ju Abram chai ju Lot lana k'ox mak'alilapanacni ixtajunita. Pus ixt'uyun'an ixtapacxanta ju tumin ju si plata chai ju oro. Chai vachu' lana k'ox lhu lac'atapacxat ju ixtalacpacxanta.

Pus ju Abram chai ju Lot tachinchokocha ju Betel. Chai ju anch ju Abram ixyajuta lakatam ixpulkan'ayacan ju Dios. Para ju ixlaclapanacni'an ju Abram chai ju Lot tatsuculh laclasanin. Pus yuch talhilasa ni va jantuch alhek'ai junta ixtalacpak'exvai ju ixlac'atapacxat'an ju ixlac'ucxtin'an.

Pus ju acsnich ju Abram junilh ju ixpuxlimti:

—Pus jantu k'ox ni va calaclasatsucu ni va lhi'alak'avin juntau. Chai ju ani lacat'un junta vilau lana k'ox alhek'ai. Pus ca palaich k'ox cava ni catalakpitsiuch. Chai lai ca'au tsucunin ju lhilacatamin ju pumatamin. Chai laich asacxt'u tas lhi'anchach ju palaich k'ox alhiulat'i ju lacat'un.



Ju Abram sacmi tas anchach ju lhitolhputun ju Lot

Pus ju Lot lakts'ilh ju k'ai acpujun ixma vanin ju laxak'aixcan Jordán. Chai ju anch lacat'un na k'ox ixjunita ju pucuxtu. Chai na lhu ix'alin ju xcan. Pus ixlhiyuchach pusacxtulhch ixtolaca ju anch lacat'un. Chai yaulich ju ixlonachaka' vanin ju xalak'achak'an Sodoma.

Para ju xalapanacni Sodoma lana k'ox k'ai ixtajunita. Pus lana jantu ixtapast'ac'a ju Dios. Pus ju Abram vachu' tolhk'alhicha ju laxalacat'un Canaán. Para jantu vanin ixt'avi ju Lot.

**Ju Dios k'elhtasunik'ojui chux
ju Canaan ju Abram**

Pus acsni tatalakpitsilhch ju Abram chai ju Lot, ju Dios xek'ela ju Abram chai junilh:

—Pus alac'avanch ju lamintalak'achok'o. Pus chux ju ani lacat'un min'apapanatni ju ac'axtaknik'oya'. Pus ju uxint'i lana k'ox lhu catajuna' ju minlac'apapanatni. Chai ju yu'unch jantu xamati' ju lai cati'alacput'ek'elh ju ixtalhavanti'an. Chai jantu at'alhan ixlacaputoc'aca ju ani lacat'un. Chai ju yuchi sich min'anu' cajunk'oya'.

Chai ju astanch alhch ju Abram ju xalak'achak'an Hebrón. Pus ju anch navichokocha lakatam ixpulak'ayacan ju Dios.

9. Ju Abram mak'elhtaxtulh ju Lot

(maxtucanta ju lacaGénesis 14)

Ju ucxinin talact'alhi'ank'o ju ixlapanacni ju Lot

Pus ju lakatam avilhchan ju ixpumat'utu'an ucxinin tat'atak'aixtoklh ju xa'ucxinin Sodoma chai Gomorra. Pus ju yu'unch tat'alasa ju Quedorlaomer. Chai ju yuchi xa'ucxtin ixjunita ju xalak'achak'an Elam. Para ju yuchi vachu'ixtat'aminta apumat'utu ucxinin.

Pus ju Quedorlaomer chai ju ixtat'amintach talhajalh ju lasat. Pus lana talaclhi'anik'o chux ju ixlac'atapacxat'an ju xalapanacni Sodoma chai ju Gomorra. Chai alact'alhi'anik'ocalh chux ju ixlactaxtokni'an. Chai vachuch alact'alhi'ancalh ju Lot ixpuxlimti ju Abram, ni Sodomach ju ixvilhcha. Pus alact'alhi'ank'ocalh vachu' ju ixlapanacni chai chux ju ixlac'atapacxat.

Ju Abram mak'elhtaxtulh ju Lot

Para putaxtulh pumatam lapanac. Chai ju yuchi alhch junini' ju Abram chux ju tuchi ixtapasatach.

Pus ju acsnich ju Abram amak'aixtojk'olhch chux ju ixlapanacni. Chai ju yu'unch ta'alhch akch'ak'ok'axmanin ju Quedorlaomer chai ju ixt'a'alhtaninch. Pus acsni talalhitajuchalhch talasalhch. Para ta'alhajanalh ju ixlapanacni ju Abram.

Pus ju Abram amak'elhtaxtok'o ju lapanacni chai chux ju lac'atapacxat ju ixtalhi'anta. Chai vachu'alact'amak'elhtaxtok'o ju Lot chux ju ixlapanacni chai chux ju ixlac'atapacxat. Pus vachu' na lhu ju lai xat'atamacajun ju ixlactaxtokni'an ju Quedorlaomer chai ju ixtat'aminta. Chai lanach ta'anchokolh ju la'ixchaka'an.

Ju Abram chai ju melquisedec talaclapakxt'ok'a

Chai ju acsni c'ata ixt'ajun pumatam lapanac ju ixjuncan Melquisedec. Chai ju yuchi tapaka'ut va nomputun, ucxtin ju navi ju soknic'a. Pus ju yuchi ixlhinajun ju xalak'achak'an Salem. Chai ju chunch nomputun ni mati' lasat. Para ju yuchi pali ixjunita ju ixch'alhcatnani ju Dios.

Pus ju Abram quitasp'itlh ju lacalaset. Chai ju Melquisedec taxtulh ixpakxtoktajica ju lacati. Para ju yuchi ixlhi'anitach ju xkapavat chai ju xaxcanch uvas, chai junilhch:

—Pus ju Dios ju xanavi ju lacat'un chai ju t'iyana k'ox ca'aklhtajuyan. Pus ju quit'in icxtaknich lak'ailakts'iuch ni yuchi ju xa'aklhtajuyan ix'alact'alalhajaca ju min'alact'alaxcai.

Pus ju Abram xtaknilh ju ix'alakacavin ju xatamin cientos ju lactaxtokni ju ixtai'inia ju Quedorlaomer. Chai t'axtaknik'o chux ju ix'alactai'inia ju ixtat'a'anta ju Quedorlaomer.

**Ju Abram jantu maklhtaiputlh ju
ixlactaxtokni ju xa'ucxtin Sodoma**

Pus ju xa'ucxtin Sodoma lanach k'ox ixk'achanta ni ixmak'elhtaxtucantach ju la'ixmacni ju ixt'alaxcai. Chai ju yuchi junilh ju Abram:

—Pus va yuchi ju aq'uinmap'usp'itninch ju quinlapanacni. Pus ju quinlactaxtoknich quijnan chach tamoconik'ojun. Pus chach t'atamoconek'ojun ju xa'alact'ai'inich ju Quedorlaomer chai chux ju ixtat'aminta.

Para ju Abram chini lhimapusp'itnilh:

—Pus jantu tu'u' actit'atamacaulh ju minlactaxtokni'an. Pus jantu iclacasq'uin ni ana'unt'it ju astan ni uxitnan ju mak'ali' xacpujun. Pus va yuchi ju aclamaklhtayauch ju ixvaitich'an ju xata'ui ju quinlapanacni. Chai laich axt'aknin lacats'unin lhak'ailakts'inti ju ts'alanch amorreonin. Pus yu'unchach ju xaquintat'aquilai ju lacalaset.

10. Ju Dios k'elhtasunilh pumatom ists'alh ju Abram

(maxtucanta ju lacaGénesis 15)

Pus ju lakatom avilhchan ju Dios junilh ju Abram:

—Pus ju quit'in acnaviya' lakatom k'ai lhamak'an ju minlacata.

Chai ju Abram lhek'elhtailich:

—Pus jantu iclaca'i ni lai tu'u' aquinlhitapalhnilh. Chai mati' ju quints'alh ju quit'in. Chai acsni tavanan acniya' va

pumatam quinlapanac ju catamoconik'oya' chux ju quin'alinta.

Para ju Dios lhek'elhtailh:

—Pus jantu chunch catilhi'ucx'alh. Pus ju uxint'i ca'alina' pumatam ju mints'alhch cajuna'. Chai lana k'ox lhu catajuna' ju minlac'apapanatni. Pus chunch ixtalhavat'an catajuna' tach ju ixtalhavat ju st'acu ju alin ju lact'iyen.



*Ju Abram junicalh ni chunch cajuna'
ju ix'apapanatni tachi ju lacst'acu*

Pus ju Abram laca'i ju tuchi xajuni ju Dios. Chai ju Dios lana k'ox lhek'achalh. Chai ni ixquiclaca'inich ju Abram, pus ju yuchi lhilhcalhch ni na k'ox lapanac ixjunita. Chai junilh vachu' ju Abram:

—Para t'un at'ic'apt'i ni quit'in ju icDios chai ni quit'in ju xacmaxtuyan ju xalak'achak'an Ur. Pus iclhimin ju ani lacat'un ni yuchi ju acmak'axtakniyanch.

**Ju Dios junilh ju Abram ni alacatam lak'achak'an
cata'ana' tolhnin ju ix'apapanatni**

Pus ju acsnich ju Abram sacmilhch ju Dios:

—Pus tas acpuc'atsayach ni vasalh q'uinmak'axt'aknit'a ju ani lacat'un.

Chai ju Dios junilh ni calaclhimilh ju atapaxat. Chai ni calakmaknilhch calhijunilhch. Pus ju Abram navi ju tuchi xalhijuni ju Dios.

Chai ju acsnich talacasunilhch ju Dios ju Abram tachi tam aklak'avanti. Chai junilh ni cachina' avilhchan ni cata'ana' tolhnin ju alacatam lak'achak'an ju ix'apapanatni. Para ju anch ma catatsucuyanta tach ju va tach'ininch tajunita. Chai junilh ni lakat'at'i cientos c'ata ju ca'alacmamak'alhk'ajnicananta ju anch.

Para ju yuchi ma ca'alacmamak'alhk'ajniya' vachu' ju xalapanacni ju anch lak'achak'an. Chai ju ix'apapanatni ju Abram lana k'ox mak'alinin tajunita acsni tavanan catataxtuya' ju anch lak'achak'an. Pus chux ju ani taxtokni ma acsni ju ca'uctaxtuya' ni nitach ju Abram.

Chai vachu' junilh ni ca'alacmaxtok'oya' ju ixlacsuniya papanti'an ju p'ulhnanch tacha'alh ju anch lak'achak'an. Pus ma ixchux'an ca'alaclhi'ank'oya' ju Canaán. Chai ju acsnich ca'alacmamak'alhk'ajniyach ju amorreonin ju tavilanalh Canaán. Pus ca'alacmak'axtakniyach ju yuchi lacat'un ju ix'apapanatni ju Abram.

11. Tsucui ju Ismael ists'alh ju Abram

(maxtucanta ju lacaGénesis 16)

Pus ju Sarai, ix'amachaka' ju Abram, mati' ixjunita ju ix'ask'at'an. Pus yuchi lhijunilh ju Abram ni cat'atamalhch ju ixsquti' juncan Agar. Chai ju chunch laich ca'alilh ju ists'alh. Pus ju Abram chunchach ju xanavi. Chai ju Agar ak'ainalhch.

Pus ju acsnich ju Agar jantuch k'ox ixlakts'in ju Sarai. Para ju Sarai lanach k'ox lhimakchapulh ju la'ixlhich'alhcat. Pus chunchach ju pu'ats'alalhch ju Agar.

Para ju Dios malakachachilh pumatam ix'anquilh ju laich ca'aklhataju ju Agar. Pus ju anquilh anch t'alalhitaju vanin junta ixvi lakatam pos. Chai ju anquilh junilh ju Agar ni ca'anchokolh junta ixvilhcha ju Sarai. Pus ju anquilh vachu' junilh ni camaklok'ona' pumatam ts'alh. Chai ju yuchi ts'alh calhimapaka'uya' Ismael.

Pus ju Agar tasp'itchokolh. Para jantuch mak'an va maklak'aulich ju Ismael. Pus ju acsnich ju Abram ixpacxantach ju ochenta y seis c'ata ixt'ak'ayanti.

12. Ju Dios t'atak'oxi ju Abram

(maxtucanta ju laca Génesis 17:1–18:15)

**Ju Dios juni ju Abram ni ca'alacch'uc'unilh
lacts'unin ju ix'axt'ak'a'an ju jok'atni**

Pus ju Dios xek'elachokolh ju Abram acsni ixpacxantach ju noventa y nueve c'ata ixt'ak'ayanti. Chai junilh:

—Pus vatach aq'uinqu'uiclac'a'it'ich ju uxint'i. Chai jantuch tavanan anavit'i tu'u' ju na amacxcai. Pus ju uxint'i alin ju tuchi aclhit'atak'oxiyan. Pus yuchi ju ani ju tuchi acnaviniyan ju quit'in. Pus lana k'ox lhu acxtakniyan ju minlac'apapanatni.

'Para vachu' acmapaxaniyan ju mintapaka'ut Abram. Chai ni va nomputun xapai ju na lak'ayacanta. Pus Abraham aclhimapaka'uyan. Chai ju yuchi nomputun ixpai'an ju na lalcalhu lak'achak'anixni.

'Pus quit'in ju ac'alac'aklhtajuk'oya' ixchux'an ju minlac'apapanatni. Chai quit'in ju ac'alacmak'axtakniya' ju Canaán. Chai ju anch ix'anuch'an cajunk'alhiya'.

'Para ju uxint'i vachu' alact'amuct'axt'uya' ju min'apapanatni ju tuchi q'uinlhit'at'ak'oxit'a. Pus alacch'uc'uniya' lacts'unin ju ix'axt'ak'a'an chux ju jok'atni ju tat'ajun ju laminchaka'. Chai vachu' chunch anaviya' ju va at'ama'ut'a chai chux ju tapacxantach tam semana ixputsucu'an.

'Pus vachu' acmapaxaniya' ju ixtapaka'ut ju Sarai min'amachaka'. Pus ju yuchi tapaka'ut va nomputun amamaxaninti. Pus ju yuchi Sara aclhimapaka'uya'. Pus ju chunch nomputun ni xak'ai. Chai acnaviniya' vachu' ju na k'ox ixlacata ju yuchi. Pus ju yuchi camaklok'ona' pumatam mints'alh. Chai ju yuchi xanati cajuna' ju na lhu lapanacni chai ju na lhu ucxtinin.

**Ju Abraham jantu laca'ini
ju ix'ak'elhtasunti ju Dios**

Pus acsni xak'esmat'a ju chunch chivinti ju Abraham va lhits'i'ilh. Chai pastaclich ni na lhixcaich ni lai ca'alilh ists'alh ju pacxantach tam cientos c'ata tam lapanac. Chai ju tam chako'ulh ju pacxantach noventa c'ata jantuch lai alin ju ix'ask'at'a. Chai junilhch ju Dios:

—Pus alhilaksit'ich ju quints'alh Ismael ni yuchach ju ap'unavit'i ju min'ak'elhtasunti.

Para ju Dios lhek'elhtailh:

—Pus jantu chunch catilhi'ucx'alh. Chai ju Ismael quit'in ju aclhist'ac'a'. Chai vachu' acnaviya' ni na lhu ix'apapanatni ca'alilh.

'Pus ixtavasalanti ju iclajunau ni ca'alina' pumatam mints'alh'an ju uxint'i chai Sara. Pus ju yuchi alakatam c'ata ju catsucuya'. Chai alhimap'ak'a'uya'it'it Isaac. Para ju yuchi chai ju ix'apapanatni vana va chun ac'alaclhit'atak'oxiya' tachi ju iclhit'atak'oxitan.

Pus acsni junk'olhch ju Dios ju ani chivinti lanach alh.

**Ju Abraham alacch'uc'uni ju
ix'axt'ak'a'an ju jok'atni**

Pus ju Abraham quiclaca'i ju tuchi xajuni ju Dios. Chai alacch'uc'unilh ju ix'axt'ak'a'an chux ju jok'atni ju ixtavilanalh ju la'ixchaka'. Pus vachu' chunch navi ju Ismael chai chux ju ixlapanacnich ju ixtatsucutach ju la'ixchaka'. Chai vachuch chunch navicalh ju ix'akstu.

Ju Dios k'elhtasuni pumatam ists'alh ju Sara

Chai ni jantuch mak'an va ju Dios talacasunichokopa ju Abraham. Pus ju Abraham ixlacxtuvi laxamalhtich ju ixlonachaka'. Chai ju acsnych alakts'ilhch pumat'utu lapanacni ju ixtayanalh vanin ju anch. Pus ju yuchi alhch alacpakxtoktaina', chai alaclhijunilhch ju vaiti.

Pus ju yu'unch ta'ak'elhtayanalhch ni catavena'. Chai ju Abraham junilhch ju Sara ni canavi ju xkapavat. Chai ju pumatam ixlapanac junilh ni calak'oxi ju tu'u' lhivai.

Pus acsni ixtat'ajunch vainin talhasacminilhch ju Sara. Chai ju yuchi alaclhek'elhtailh ni ixtanun pulacni ju



*Ju Abraham alact'avajin ju ixpumat'utu'an
lapanacni ju taquilakquilalh*

la'ixchaka'. Pus ju pumatam ixlhiyu'unch ju ixta'alakxcavatayananta yuchi ju Dios. Pus ju yuchi tach lapanac ixminta. Chai ju yuchi junilh ni catasp'itchokoyanta ju ixlhitam c'ata. Chai ju acsnich ju Sara ca'alinach pumatam ists'alh.

Pus ju Sara k'esmatlh ju tuchi ixnajunta ju yuchi chai lhits'i'ilh. Pus ju yuchi pastaclich ni na t'acuch ixjunita chai na lhixcaich ni lai ca'alilh ju ix'ask'at'a.

Pus ju Dios junilh ju Abraham ni jantu va calhitsu'i'ilh ju Sara. Chai ju Dios mati' tu'u' ju jantu lai canavi nin tu'u' ju lhixcai calhiula. Pus junchokolh ni catasp'itchokoyanta ju ixlhitam c'ata. Chai ju acsnich alinch ju ists'alh ju Sara.

Pus ju Sara lanach k'ox ixtalhananta. Pus yuch lhijunilh ni jantu va ixlhitsu'i'inta. Para ju Dios lhimapusp'itnilh:

—Vasalh va lhitsu'i'i ju xacnajun.

13. Ju Dios puxavama ju lak'achak'an Sodoma chai Gomorra

(maxtucanta ju lacaGénesis 18:16–19:38)

Ju Abraham alact'a'alhtanalh ju ixtaquimacuvilata

Pus ju lapanacni ju ixtalakxcavatajita ju Abraham tataxtulh ju la'ixlonachaka'. Chai ju yu'unch tach'apalh ju xati ju xalak'achak'an Sodoma. Chai ju Abraham makat ju alajquimacaulh ju lacati.

Pus ju pumatam ixlhiyu'unch yuchi ju Dios ju tach lapanac ixminta chai ju yuchi pastaclich:

—Pus jantu va actimatank'anunilh ju Abraham ju tuchi icnaviputun. Pus ju yuchi ixpai'an catajuna' chux ju quinlapanacni. Pus ju yuchi icsacstuta chai iclhistacta ni yuchi ju ca'amalaniya' ju ixlapanacni tach ju aquintapulak'ayaya'. Chai ca'amasuniya' ixnavica ju k'ox chai ju soknic'a.

Pus ju Dios junilh ju Abraham ni ca'amalajc'acxak'oya' ju xalapanacni Sodoma chai ju Gomorra. Para p'ulhnan ca'alakts'ina' ni vasalh na k'ai tajunita ju anch tavilanalh lapanacni tach ju ixk'esmattach.

Ju Abraham tapaininij ju Dios ixlacata ju amachak'an Sodoma

Pus ju ixpumat'uich'an lapanacni ta'alhch ju Sodoma. Para ju yu'unch anquilhnin ixtajunita. Pus ju acsnich ju Dios chai ju Abraham va ixt'iyunch'an tatamacaulh. Chai ju Abraham sacmilhch ju Dios:

—Pus ni catatsuculh ju t'up'uxancau lack'oxin lapanacni ju Sodoma, ja alact'ilhiya' ju lak'achak'an. Para ca jantu k'ox ni va ac'alact'amakni ju lack'oxin lapanacni ju alactu'unin. Pus ju uxint'i tach tam ucxtin'at ju navi ju soknic'a ju ixlhilacaputs'un ju lacamunutpa'. Pus ju quit'in ijc'atsai ni va yuchi ju anaviya' ju soknic'a.

Chai ju Dios junilh ni jantu catilact'ilhilh ju Sodoma ni capacxalh ju t'up'uxancau lack'oxin lapanacni. Pus ju Abraham palaich lhilaksi ju Dios chai sacmichokopa:

—Pus ni ca'alilh ju t'up'uxamquis lack'oxin lapanacni ju Sodoma, ja alact'ilhiya'.

Chai ju Dios lhek'elhtailh ni jantu. Chai ju Abraham tailhi'alh ixsaemica ju Dios:

—Pus ni ca'alilh ju t'up'uxam u pumap'uxancau u pumap'uxam u pumacau lack'oxin lapanacni, ja alact'ilhiya' ju Sodoma.

Chai ju Dios lhek'elhtailh ni jantu catilact'ilhilh ju Sodoma ni chunch lack'oxin lapanacni ju cata'alilh. Pus acsni nonk'olhch ju chunch chivinti ju Dios anchokolhch. Chai ju Abraham alhch ju la'ixchaka'.

Ju Dios mak'elhtaxtulh ju Lot

Pus ju ixpumat'ui'an anquilhnin tok'oxatach tacha'alh ju Sodoma. Pus ju Lot anch talhitaju junta ixlacxtuvi ju laxamalhtich ju ixpulak'achak'axnucan ju lak'achak'an. Pus acsni alakts'istuclh ju Lot lana alh alaclak'apakxtoktaina'.



Ju lapanacni talakp'akx'ulaniputun ju ixmalhtich ju Lot

Chai alack'ailhi'alh ni cata'alh lakacujnin ju acs ts'is ju la'ixchaka'. Pus ju yu'unch ta'ak'elhtayanalh chai tat'a'alh.

Pus acsni talacvenk'olhch ju tok'oxai talactavilhch. Para ju xalapanacni Sodoma lanach sok'o taxc'avit'ulak'o ju ixchaka' ju Lot. Pus ju acsnich tajunilhch ju Lot ni ca'alacmaxtulhch ju lapanacni. Chai ju yu'unch laich catalact'atamaya'.

Pus ju Lot na ti'alacjunilh ni jantu catanavi ju chunch alactu'unti. Chai alacjunilh ni alaich yu'unch ju chunch catanavi ju pumat'ui ix'atsi'in ixpaxanta. Para ju yu'unch atsi'in jantuca' ixtamispai jok'at.

Para ju xalapanacni Sodoma lana jantu xatak'esmatniputun. Pus alaich va talhit'alatalhk'amnilh. Chai lanach ixtalakp'akx'ulaniputun ju ixmalhtich.

Para ju anquilhni lana sok'o tamanu ju Lot chai tamalacchaulich. Chai acsni tamalacchaulich ju malhtich, alacmalak'ach'ixlalachch ju lapanacni. Pus ju chunch jantuch tavanan lai talhitaju ju xamalhtich ju chaka'.

Pus ju acsnich ju anquilhni tajunilhch ju Lot ni ca'at'ataxtulhch ju ixlapanacni. Chai catamocomalhch ju Sodoma ni va calact'ilhik'ocanach ju anch.

Pus ju acsnich ts'is ju Lot alacjunilh ju ix'aput'inch catajuna' ni catataxtulh. Para ju yu'unch jantu talaca'i ni lai calact'ilhilh ju Dios ju Sodoma. Pus tajunilh ni jantu catitat'a'alh.

Pus acsni tsuculhch tuncunu' ju anquilhni tajunilh ju Lot ni vats'alhtich ca'alact'ataxtulh ju ixt'acu chai ju ix'atsi'in ju Sodoma. Para ju yu'unch lana k'ox lacsni ixtat'ajun lac'alak'oxinin.

Pus ju acsnich ju anquilhni talact'amakch'apaxtulhch ju ix'amachaka' chai ju pumat'ui ix'atsi'in ju Lot ju xalak'achak'an Sodoma. Chai ju acsnich tajunilhch ni p'as ca'alh ju vanin ta lacvi ju talhpa.

Chai tajunilh ni jantu catalak'asp'itlh ni va calact'ilhik'oya' ju Dios chux ju k'ai acpujun. Chai ca'alact'ilhik'oyach ju lak'achak'anixnich ju vaninch lact'alanavita.

Ju Dios lact'ilhilh ju Sodoma chai ju Gomorra

Pus ju Lot lana k'ox ixtalhanan. Chai alactapaininilh ni catamoconilh ni ca'alhch anch junta ixma lacat'icst'i lak'achak'an juncan Zoar. Chai ju anch lak'achak'an vanin

junta ixma ju k'ai acpujun. Pus ju anquilhnin tajunilh ni laich
ca'alh ju anch. Para tajunilh ni p'as ca'alh.



*Ju anquilhnin talacmasok'o ni va ts'alhti
ca'alact'ataxtulh ju ix'atsi'in ju Lot*

Pus ta'alhtana'alhch ju xalak'achak'an Zoar. Para ju ix'amachaka' ju Lot talak'asp'itlh ju la'ixlhipulacan. Pus ju acsnich lanach va tapala matsat tachi ju chiux.

Pus ixt'ajunch tuncunu' acsni alact'acha'alh ju ix'atsi'in ju Lot ju Zoar. Chai ju acsnich ju Dios t'amacamilhch ju azufre ju jipi. Pus puxavamak'olhch ju Sodoma, Gomorra chai ju lak'achak'anixnich ixma ju k'ai acpujun.

Pus va yuchi ju putaxtulhch ixpuxavamaca ju Zoar. Pus lana tanik'o chux ju xalapanacni ju anch lak'achak'an. Chai lana lacts'ank'ak'o chux ju lac'ach'ananti ju ix'alin.

Para ju Dios ixmak'elhtaxtutach ju Lot ni va ixpuxlimtich ixjunita ju Abraham. Pus ju Dios lana k'ox ixmapaini ju Abraham.

Pus ju alakatam vats'isin ju Abraham taxtulh ju la'ixchaka'. Chai laca'alh junta ixma ju k'ai acpujun chai lakts'ilh ni na ix'akjinica' ju anch.

Pus acsni astanch va, ju Lot alhch tsucunu' junta quiclhucucu talhpa. Chai ju ix'atsi'in na ixtalactalhanantach ni jantuch cati'alac'icalh. Chai ju chunch cats'ank'ayach ju ix'ask'at'an ju ixpai'an. Pus ju acsnich tamakt'ak'ap'alhch ju ixpai'an ju lakatam avilhchan. Chai ixt'iyunch'an ju tat'atama.

Pus chunchach ju tapu'ak'ainalh. Pus ju xak'ai alilh pumatam ists'alh ju lhimapaka'u Moab. Chai ju yuchi ixpaich'an tava ju moabitanin. Chai ju xalacat'icst'i alilh pumatam ists'alh ju lhimapaka'u Ben-ammi. Pus ju yuchi ixpaich'an tava ju amonitanin.

14. Tsucui ju Isaac ists'alh ju Abraham

(maxtucanta ju lacaGénesis 21)

Pus ju Dios muctaxtu ju tuchi ixk'elhtasunita ju Sara. Pus ju yuchi ak'ainalh chai maklak'aulh pumatam ts'alh. Chai ju yuchi ts'alh talhimapaka'u Isaac.

Chai ni ixpacxantach ju lakatsajin avilhchan ju ixputsucu, ju Abraham navi tach ju ixjunitach ju Dios. Pus ch'uc'unilh lacat'icst'i ju ix'axt'ak'a ju Isaac.

Pus ju acsnich avilhchan ju Abraham ixpacxantach ju tam cientos c'ata ixt'ak'ayanti. Para ju yuchi chai ju Sara lanach k'ox ixtak'achanta ni ix'alinch pumatam ists'alh'an.

Chai acsni macaulich ju ists'iq'uit ju Isaac, ju Abraham navi lakatam k'ai c'atan. Chai acsni ixt'onica' ju c'atan ju Sara lakts'ilh ni va ixt'ajun mamaxanini' ju Ismael ju ask'at'a Isaac.

Pus ju Sara lana k'ox lhitalhk'amalh. Chai junilh ju Abraham ni caxcots'alalhch ju Ismael. Chai cat'amalakachalhch ju ixnati juncan Agar. Pus ju yuchi chako'ulh va isquiti' ixjunita ju Sara ju va ixtamajuta. Chai jantu ixlacasq'uin ni cat'alalhvaklh ju Ismael ju ixherencia ju ists'alh.

Pus ju Abraham lana jantu k'ox ixc'atsan. Pus na ixmapaini vachu' ju Ismael. Para ju Dios junilh ni k'oxich cava ni ca'alacmaxtulhch ju la'ixchaka'. Chai junilh ni na lhu cata'alina' ix'apapanatni'an ju Ismael chai ju Isaac.

Pus ju acsnich ju Abraham malakachalhch ju Agar chai ju Ismael. Para ju Dios lana k'ox alaclhistach.

15. Ju Dios lakts'intanui ju Ix'alaca'inti ju Abraham

(maxtucanta ju lacaGénesis 22)

Ju Dios juni ni camakni ju ists'alh ju Abraham

Pus ju Isaac k'ayats'alhch va. Chai ju acsnich avilhchan ju Dios lakts'intanulhch ju Abraham ni vasalh ixquiclaca'i ju tuchi ixjuni chai ni catasulhch ni vasalh ixlhichux ix'alhunut ju ixquiclaca'iputun.

Pus junilh ni calhi'alhch ju Isaac ju lactalhpa juncan Moríah. Pus anchach ju camaknicha ju ask'at'ats'alh. Chai calhijunilhch tach ju talaich ju lapanacni ju taxtakni lhak'ailakts'inti ju Dios.

Pus ju Abraham lana k'ox ixquiclaca'iputun ju Dios. Pus lakat'utu avilhchan ju ta'alhtanalh ju tapucha'alh ju Moríah. Pus acsni vaninch ixtacha'amputun ju anu' lacat'un ju Isaac junilh ju Abraham:

—Pus tach ni lhimink'otauch ju tuchi tasq'uini ixlacata ju lhak'ailakts'inti. Para ju calhnilu jantu t'alhimintau. Chai ju Abraham lhimapusp'itnilh ni Dios ju ca'axtakniya'.

Ju Dios axtaknilh lakatam calhnilu

Pus acsni tacha'alh ju anu' lactalhpa, ju Abraham navi lakatam ixpulkan'ayacan ju Dios. Chai ju yuchi si chiux ju lhinavi. Chai mak'aixtoklich ju q'uiu ju capumalhculayach. Pus ju astanch makch'ilh ju Isaac. Chai mamalhch ju la'ix'ucxni ju q'uiu. Chai saclich ju cuchilu ju capumakniyach.



Ju Abraham mamai ju Isaac ju la'ix'ucxni ju ixpulkan'ayacan ju Dios tach tam lhak'ailakts'inti

Pus ju acsnich ju Dios xek'elalhch. Chai junilh:

—Abraham.

Chai ju Abraham lhek'elhtailich:

—Pus ani icya.

Chai ju Dios junilhch:

—Pus jantu amaknit'i ju mints'alh. Pus ju uxint'i q'uinmalac'asuninch ni vasalhch q'uinq'uiclac'a'ip'ut'un. Pus vasalhch xaq'uinmak'axt'aknip'ut'un ju lakatami mints'alh.

Pus ju Abraham talakst'alhch ju talaclhman. Chai lakts'ilhch ni ixpalhui lakatam calhnilu ju laca'alhtucunan. Pus p'uxlich ju yuchi chai maknilhch tach ju ixlhak'ailakts'intich ju Dios.

Pus ju acsnich ju Dios xek'elachokopa chai junilh:

—Pus ju uxint'i vasalhch ixmaknip'ut'un ju mints'alh ju va quinquiclac'a'icach. Pus ju chavai vachu' acnaviyan ni na lhek'ach ats'uc'uya'. Pus lana k'ox lhu cata'alina' ju minlac'apapanatni. Pus chunch ixtalhvat catajuna' tach ju ixtalhvat ju st'acu ju alin ju lact'iyen. Chai chunch tach ju cucu ju alin ju la'ixquilhtu' ju alama.

'Pus ju yu'unch vatach cata'alaclhajayach ju ix'alact'alaxcai'an. Chai ixlhilacaputs'un ju lacamunutpa' ju ac'alac'aklhtaijuya' va ixlacata ju minlac'apapanatni ni uxint'ich ju xaq'uinq'uiclac'a'i. Pus chux ju ani taxtokni ca'uctaxtuya' va ixlacata ni q'uinq'uiclac'a'it'i.

Pus ju astanch ju Abraham alhch tolhna' ju Beerseba.

16. Nilh ju Sara ix'amachaka' ju Abraham. Ju Isaac t'atamak'axt'ok'a ju Rebeca

(maxtucanta ju lacaGénesis 23–24)

Nilh ju Sara

Pus acsni mak'anch va, ju Abraham chai ju ixlapanacni ta'alh tolhnin ju xalacat'un Hebrón. Chai anchach ju nicha ju Sara. Pus ju acsnich ixpacxantach ju tam cientos alakap'uxamtujun c'ata acsni nilh. Pus ju Abraham lana k'ox ix'amak'anininta ju la'ix'alhunut.

Pus ju acsnich ixmaktasq'uinich lakatam lacat'un junta camacnuluhch ju Sara. Chai alhch alakts'ini' ju heteonin ju ixtavilanalh ju anch lak'achak'an. Pus ju yuchi tamonilhch lakatam quiclhucucu talhpa ju lapanac juncan Efrón. Chai ju

anch ixtapalhni ju lakat'at'i cientos ju xatumin ju si plata. Pus ju anch quiclhucucu talhpa ixlhimapaka'ucan Macpela.

**Ju Abraham malakacha ju ixlapanac
ju lak'achak'an Haran**

Pus acsni nilhch ju Sara, ju Abraham ixmamak'axtokputunch ju Isaac. Para jantu ixlacasq'uin ni cat'atamak'axtoklh ju pumatam cananea. Pus malakachalhch ju ixlapanac ju palaich ixlhilaksi ju la'ixchaka'an ju ixlhi'alak'avin. Chai ju yu'unch ixtavilanancha ju xalak'achak'an Harán. Chai anchach ju capuxconicha ju ix'amachaka' cuna' ju ists'alh. Pus acsni tuca' ixmalakachai ju ixlapanac mak'elhtasuni ni capuxconiya' ix'amachaka' ju Isaac. Chai calhimiya'. Para jantu catilacasq'uinilh ni ca'alh ju Isaac t'atolhna' la'ixchaka' ju ix'asq'uininti.

Ju ixlapanac ju Abraham alh ju Haran

Pus ju ixlapanac lakacau camello ju lacmac'uc'a ju laclhak'ailakts'inti. Chai alhch ju Harán junta ixvilhcha ju Nacor. Chai ju yuchi ixlak'au ixjunita ju Abraham.

Pus tok'oxatach cha'alh junta ixvi lakatam pos la'ixquilhtu' ju lak'achak'an. Chai ju camellojni lanach k'ox ixtalajquicxixta. Pus alacma'aktsok'otalhch ixk'otca ju xcan. Pus ju acsnich hora ju xa'atsi'in Harán ixtat'ajunch cha'anin ju lacapos ix'ica ju xcan. Pus ju lapanac t'achivinilh ju Dios, chai junilh:

—Pus uxint'i ju Dios'at ju lak'ayayan ju quin'ucxtin Abraham. Pus aq'uin'aklht'ai'ut'i ni k'ox calhixajcha ju tuchi acnaviya' chai ni yuchi ju xaquinlhijuni ju quin'ucxtin Abraham.

'Pus vanin icya junta vi ju pos. Chai ju atsi'in taminch inin ju xcan. Pus lamapainin icsq'uiniyan ni uxint'i ju asacst'u ju atsi' ju ix'amachaka' cajuna' ju Isaac. Chai ju yuchi acsq'uiniya' lacats'unin ju xcan ju va ack'ot'a'. Pus ju acsnich laich aquinjuna' ni vachu' ca'alacmak'ot'uya' ju xcan ju quinlajcamellojni. Pus ju chunch acpuc'atsayach ni ixtavasalantich t'a'un aklhtaijunu' ju quin'ucxtin.

**Ju Rebeca alact'amak'ot'u ju xcan ju
lac'atapacxat ju ixlapanac ju Abraham**

Pus ixt'ajunca' t'achivini' ju Dios ascni lakts'ilh pumatam atsi' ju lana k'ox c'us ixjunita. Chai ju yuchi va ixmintach ini' ju xcan.

Pus ju atsi' laktsamalhch ju xcan ju ix'akxau. Chai ju ixlapanac ju Abraham tailajk'alhch vanin junta ixya ju atsi'. Chai junilh ni caxtaknilh lacats'unin xcan ju cak'ot'a'. Pus ju yuchi xtaknilh ju xcan ju xasq'uini. Pus vachu' junilh ni ca'alacmak'ot'uyach vachu' ju camellojni.

Pus alacmak'ot'ok'o ju xcan ju camellojni ju atsi'. Chai ju lapanac lacmajcutulh ju ali' ju lhak'ailakts'inti ju ixlhi'anta ju na lajc'us chai xtaknilh ju atsi'. Chai sacmilhch tis chavaich ju ixpai ju atsi'. Chai sacmi ni lai calakacujtilalh ju acsni atats'is ju la'ixchaka'. Pus ju atsi' junilh ni ixtsi' ixjunita ju Betuel ixts'alh ju Nacor. Chai junilh ni alin ju ixvaiti'an ju camellojni ju la'ixchaka'. Chai vachu' alin junta lai calakacujtilalh ju yuchi.

Pus ju acsnich ju lapanac mamactanulhch lakat'ui mactanut ju atsi'. Chai xtaknilhch lak'ailakts'iuch ju Dios ni yuchach ju ix'aklhtajuta chai ni ixlhicha'antach ju la'ixchaka' ju ix'alak'avin ju Abraham. Pus chunchach ju laich ixpu'aklhtajuta ju ix'ucxtin.



*Ju ixlapanac ju Abraham mamactanui
ju mactanut ju Rebeca*

Pus ju atsi' Rebeca ats'ala'alhch ju la'ixchaka'. Chai alacjunk'olhch ju ix'alak'avin ju tuchi ixtapasata. Pus ju ixlak'au juncan Labán lana alh sok'o pakxtoktaina' ju ixlapanac ju Abraham. Pus lana lhi'alh ju la'ixchaka' chai anchach ju lacch'iyaulh ju ixlajcamellojni.

**Ju ixlapanac ju Abraham
alact'atak'oxich ju ixlacpai ju Rebeca**

Chai ju astanch inilhch ju ixvaiti. Para ju yuch naulh ni jantu cativailh tus ni jantu najun tis ixlacatach ju ixlak'anta.

Pus ju acsnich alacjunilhch ni ixlapanac junita ju Abraham. Chai ju Abraham va ixmalakachata ni ca'alh puxconini' ix'amachaka' ju Isaac. Chai vachu' alacjunilh ju tuchi sq'uinilh ju Dios acsni t'achivinilh chai ni yuchach ju ixcha'anta ju Rebeca ju lacapos. Pus ju acsnich xtaknilh ju xcan acsni sq'uinilh. Chai vachu' alacmak'ot'ok'o ju lajcamellojni.

Pus ju acsnich alacsacmilhch ni lai catamoconilh ju Rebeca ni ca'alh t'atamak'axtoknu' ju Isaac.

Pus ju Betuel, ixpai ju Rebeca, chai ju Labán, ixlak'au, tapastaclich ni Dios ju ixnavita ju ani lhamak'an chai ni Dios ju ixlhilhcata ni cat'atamak'axtoklich ju Rebeca ju Isaac. Chai ju acsnich tajunilhch ni laich ca'alh t'atamak'axtoknu'.

Pus ju acsnich ju ixlapanac ju Abraham alacxtaknilhch ju lhak'ailakts'inti ju ixlacpai ju Rebeca. Chai ju anu' lhak'ailakts'inti lana k'ox laklhu ixlactapalhni. Pus acsni talacvenk'olhch ta'alhch laclhtatanin.

Ju Isaac t'atamak'axt'ok'ach ju Rebeca

Para acsni tuncunchalhch, ju ixlapanac ju Abraham alacsacmilhch ni laich catamoconilh ni cat'a'alhch ju Rebeca. Pus ju ix'alak'avin tajunilh ni palai k'ox cava ni palaich lakalhu avilhchan catavi. Para ju yuchi ix'anchokoputunch chai ju Rebeca na ixt'a'amputunch.

Pus ju acsnich vats'isin ta'alhch junta ixvilhcha ju Isaac.

Pus acsni tacha'alhch, ju Isaac navilhch ix'amachaka' ju Rebeca. Chai ju yuchi lanach k'ox mapaini.

17. Ni ju Abraham

(maxtucanta ju laca Génesis 25:1-18)

Acsni mak'anch va ju ix'aninti ju Sara, pus ju Abraham tamak'axtokchokolhch. Chai pumachaxan ix'ask'at'an tit'apacxanchokolh ju ix'amachaka'.

Pus ju Abraham ixpacxantach ju tam cientos a setenta y cinco c'ata ixt'ak'ayanti acsni xani. Pus ju Isaac chai ju Ismael anch tamacnulhch junta ix'acnui ju Sara laxalactalhpa ju Macpela.

Para acsni nilhch ju Abraham, Isaacch ju tamacaulh ix'okxtapalhni ju ixpai. Chai yuchach ju palai lhu tamoconilh ju ix'alit ixpai.

Pus ju acsnich ju Ismael na pumalhuch ixtajunita ju ists'alan. Chai anch ixtavilanancha ju ixlhich'ato'anta ju laxalacat'un Canaán.

Para ju Dios lana k'ox ixt'ajun aklhtaijunu' ju Isaac.

18. Ju Jacob, ixts'alh ju Isaac, okxchok'olh ju ixlak'au Esaú

(maxtucanta ju laca Génesis 25:19–28:22)

Tatsucui ju Esaú chai ju Jacob

Pus ju Rebeca, ix'amachaka' ju Isaac, lakap'uxam c'ata ju mati' ixjunita ju ix'ask'at'a. Pus ju Isaac t'achivinilh ju Dios chai sq'uinilh ni ca'axtaknilh ju ix'ask'at'a'an. Pus ju Dios mapusp'itnilh ju ixchivinti chai ju Rebeca ak'ainalhch.

Pus ju acsnich ju Rebeca na ix'ucsac'atsaich ni na va ixtalacnavi ju la'ixpulangni. Chai ju acsnich sacmilhch ju Dios tis ixlacatach ju chunch ixpu'ucsac'atsaich. Pus ju acsnich ju Dios junilhch ni ixlacata ni va pumat'ui lapanac ju capacxana'. Chai ju yu'unch va lakatam avilhchan ju cataputsucuya'.

Chai junilh vachu' ni quilhmactamin ixlapanacni catapacxana' ju pumatamin. Chai ju palai xalacat'icst'i yuchi ju palai tachapun cajuna'.

Pus tach ju ixjunitach ju Dios chunch ju xa'uctaxtui. Pus va aktam tachilh ju pumat'ui ts'alan. Pus ju p'ulhnan tsuculh lanach va k'aixlapulh chai lanach va k'aixluyu ixjunita. Pus ju yuchi lhimapacutucalhch Esaú.

Chai ju pumatam lanach va ixt'alataimatacha. Chai ju yuchi va ixch'anch'apamintach ju Esaú. Pus ju yuchi lhimapacutucalhch Jacob.

Pus acsni talact'ak'ayalhch, ju Esaú lana k'ox k'achanilh ju ix'amaxcavaninti. Para ju Jacob lana k'ox ixk'achani ixtamacajunca ju lacachaka'.

Pus ju Isaac lana k'ox ixmapaini ju Esaú. Pus ju Isaac lana k'ox can ixlhiulai ju lhivai ixlhimin ju Esaú acsni ix'an amaxcavanini'. Para ju Rebeca lana k'ox ixmapaini ju Jacob.

Ju Esaú t'alast'anilh ju ixpuxak'ai ts'alh ju lacachaka' ju ixp'isek'e ju juncan Jacob

Pus ju lakatam avilhchan ju Jacob tamocompa ju la'ixchaka' tach ju akts'iya ixlaich. Pus ju acsnich lak'oxilhch tijtam calhtu.

Pus ju acsnich ju Esaú lana k'ox ixk'opta ni quitasp'itlh ju la'ix'amaxcavaninti. Chai sq'uinilh ju Jacob ni caxtaknilh lacats'unin ju ixcalhtu.

Pus ju Jacob junilh ni lai caxtaknilh ju ixcalhtu. Para ju yuchi va calhimapaxanilh ju ixpuxak'ai ts'alh ju lacachaka'.



Pus ju Esaú lana jantu pastaclh ni lai tu'u' calhitapalhnilh ju ixpuxak'ai ts'alh ju tam xamati'. Pus ju yuchi junilhch ni k'oxich cuna' ni calhimapaxaniyach.

Pus ju acsnich ju Jacob t'axtaknilhch ju xkapavati ju calhtu.

Ju Jacob xtakni ju calhtu ju Esaú

Ju Dios lana k'ox matajtani ju Isaac

Pus ju lakatam avilhchan lana k'ox alilh ju chavan ju anch lak'achak'an. Para ju Dios talacasunilh ju Isaac chai junilh ni jantu ca'alh ju Egipto. Chai junilh:

—Pus quit'in ju act'atolan chai na ac'aklhtaijuyan ju lamin'atsucunti. Chai acmuctaxtuniyan ju tuchi ick'elhtasunita ju Abraham. Pus min'apapanatnich ju ac'axtaknik'oya' ju ani xalacat'un Canaán.

'Pus lana k'ox lhu catajuna' ju minlac'apapanatni. Pus chunch ixtalhvat catajuna' tach ju ixtalhvat ju st'acu ju alin ju lact'iyen. Pus chux ju ani taxtokni acmuctaxtuya' va ixlacata ni quinquilaca'i ju Abraham.

Pus ju Dios vasalh akhlhtaiju ju Isaac. Pus ju Isaac lana k'ox mak'ali' ixjunita. Chai lana k'ox lhu ixpacxanta ju ixlac'atapacxat chai ixlapanacnich.

Pus acsni pacxalhch ju t'up'uxam c'ata ixt'ak'ayanti ju Esaú alact'atamak'axtoklich pumat'ui chakolun. Para ju Isaac chai Rebeca lana jantu ixtalack'achanta. Pus ju yu'unch chakolun va heteanin ixtajunita.

Ju Isaac matajtani putunch ju Esaú

Pus acsni na papach ixjunita ju Isaac jantuch lai ix'alacavanan. Chai pastaclich ni ca va ts'alhtich caniya'. Pus ju acsnich pastaclich ixtaknica ju atap'aksinti ju xak'ai ists'alh. Pus chunchach ju ixtalhlanita ju mak'aniya lapanacni.

Pus t'asanilhch ju Esaú chai junilhch ni ca'alhch amaxcavanini'. Chai ni cach'apachalhch ju atapacxat calak'oxinilhch ju xalhivai. Chai calheminilhch ju ixpai ni laich ca'ulh. Pus ju chunch laich calhisq'uiniya' ju Dios ju k'ox atsucunti ixlacata ju ists'alh.

Ju Jacob okxchok'oi ju ixpai

Pus ju Rebeca lana k'esmatk'o chux ju ani lacchivinti. Chai acsni taxtulhch ju Esaú ix'amaxcavaninti, pus lana t'asanilhch ju Jacob. Chai junilh ni calheminilh lakat'ui tentson.

Pus chunch ju navilhch ju Jacob. Pus lheminilhch ju lakat'ui tentson ju ixnati. Chai ju yuchi lak'oxinilhch ju ixvaiti ju Isaac tach ju akts'iyen na ix'uich.

Pus ju acsnich ju Rebeca malakch'inilhch ju Jacob ju ixlacpumpu' ju Esaú. Chai ju la'ixlacmaca' lacmacmuc'alhch ju ix'axt'ak'an ju tentson. Chai pixtumuc'alhch vachu' ni na pixtupalhilhich cava tach ju Esaú. Chai xtaknilhch ju ixlak'oxitach ju vaiti. Chai junilhch ni calhi'anilhch ju ixpai. Pus ju chunch laich capusq'uiniya' ju ixpai ju Dios ju k'ox atsucunti ix'okxtapalhni ju Esaú.



*Ju Jacob lhimini ju ixvaiti ju Isaac
ix'okxtapalhni ju Esaú*

Pus ju acsnich ju Jacob alhch junta ixvilhcha ju ixpai. Chai malaca'inilhch ni yuchi ixjunita ju Esaú. Pus ju Isaac laca'ilhch ni yuchach ixjunita ju Esaú. Pus chunch putapasalh ju Isaac ni va ixlhilak'axt'akcanch ju ix'axt'ak'an ju tentson ju Jacob chai ni ixlakch'initach ju ixpumpu' ju Esaú. Para ju ixpai ixk'elhamispatach ju ixchivinti ni ixchivinti Jacob ixjunita.

Pus lhisq'uinilh ju Dios ni caxtaknilh ju lack'oxi ach'ananti ju ists'alh. Chai junilh ni ca'aklhtaiju ni lai na lhu lapanacni ju ca'alaclhijunilh. Chai vachu' lhisq'uinilh ni Jacob ju ca'alaclhijuna' ju ix'alak'avin. Pus vachu' na k'ox ca'alakts'ilh ju k'ox catalakts'ina' ju Jacob. Chai camacaulh ni macxcai catatapasalh ju jantu k'ox catalakts'ilh.

Ju Esaú mak'ats'ank'a ju ix'amatajtanti

Pus ju Isaac va anca' ixmap'aksik'ojui ju Jacob acsni tanucha ju Esaú. Chai ixlhimintach ju xalhivai ju atapacxat ju ix'amaxcavaninti. Chai junilhch ni camap'aksilhch.

Pus ju Isaac c'atsalhch ni Jacob ju ixmap'aksita ix'okxtapalhni ju Esaú. Pus ju acsnich lanach k'ox amak'aninilh ni va ix'okxchok'otach. Para jantuch lai tu'u' navi ixlacata ju chunch.

Pus ju acsnich ju Esaú tapaininilhch ju ixpai ni vachuch calhisq'uinilh ju Dios ju k'ox atsucunti ixlacata ju yuchi.

Pus ju Isaac junilhch ni anch catsucuya' junta lak'amakat junita junta na k'ox lacat'un. Chai vachu' na lasani lapanac cajuna'. Chai vachu' junilh ni Jacob ju calhijuna'. Para camina' avilhchan acsni cat'alak'aya' ju yuchi.

Ju Jacob tatank'anunilh ju Esaú

Pus ju Esaú lana k'ox ixt'alatalhk'amnita ju Jacob ni va ixtai'initach ju ix'atap'aksinti. Chai tsuculhch pastacna' tayu laich capumakni acsni canilhch ju Isaac.

Para ju Rebeca c'atsa ju tuchi ixt'ajun pastacna' ju Esaú. Chai pastaclich ni palai k'ox cava ni cataxtulh ju Jacob ju anch lak'achak'an.

Pus junilhch ju Jacob ni palai k'ox cava ni ca'alh t'atolhna' ju ixcucu Labán tach pants'iq'uis. Pus acsnich ju caminchokolhch ni cak'oxamixchokolhch ju Esaú.

Chai ju Rebeca junilh ju Isaac ni jantu k'ox lhiulai ni cat'atamak'axtoklh ju Jacob tam chako'ulh hetea. Pus ju acsnich ju Isaac t'asanilhch ju Jacob. Chai junilhch ni ca'alhch ju la'ixchaka' ju ix'alak'avin ju ixnati. Chai anchach ju capuxcocha ju ix'amachaka'.

Pus ju Jacob alhch junta malakacha ju ixpai.

Pus junta maktok'oxalhch ju lacati anch ju lakacujtilalh. Pus ju acsnich atats'is ju Jacob lhaklak'avanalhch lakatam ch'ac'an ju ixch'antai lacat'un chai ixcha'anta tus lact'iyán. Chai anchach ju ixtaputoc'ai chai ixtaputak'elhtajui ju anquilhnin. Pus ju acsnich ju Dios talacasunilhch chai junilhch:

—Pus quit'in ju ixDios ju Abraham chai ju Isaac. Pus ac'axtakniya' ju xalacat'un Canaán ju minlac'apapanatni. Chai



*Ju Jacob lhaklak'avanoan ju ch'ac'an junta
taputak'elhtajui chai taputoc'ai ju anquilhni*

ju uxint'i lana k'ox lhu catajuna' ju minlac'apapanatni. Pus
quit'in ju aclhist'ac'an ju uxint'i vanta anchach ju p'in. Chai
aclhiminchokoyan ju laminchaka'.

Pus acsni cujlich ju Jacob c'atsalhch ni Dios ju ixt'avi ju anch lacat'un. Pus ju anch lacat'un ixlhiyuchach lhimapacutulhch Betel. Chai ju chunch va nomputunch ni ixchaka' ju Dios.

Pus ju acsnich k'elhtasunilhch ni calak'ayaya' ju Dios. Chai caxtakniya' ju ix'alakacavin ju tamin cientos chux ju taxtokni ju capacxalh. Para p'ulhnan calakts'ina' ni vasalh calhist'ac'a'. Chai ni vasalh calhiminchokoya' ju la'ixchaka'.

19. Ju Jacob anch vi ju la'ixchaka' ju Labán chai t'atamak'axtoklh ju Lea chai ju Raquel

(maxtucanta ju lacaGénesis 29–33; 35–36)

**Ju Jacob alact'atamak'axt'ok'a
ju Lea chai ju Raquel**

Pus ju Jacob cha'alh ju la'ixchaka' ju Labán chai ju yuchi laxalak'achak'an Harán ju ixvilhcha. Chai tam malhquiuyu' tavi ix'aklhtaijuca ju ixucu ju la'ixlhich'alheat.

Pus ju Labán ix'alín pumat'ui ix'atsi'in ju ix'ajuncan Lea chai Raquel. Pus ju Lea yuchi ju xak'ai ixjunita para jantu c'us ixjunita. Chai ju Raquel xalacat'icst'i ixjunita para ju yuchi lana k'ox c'us ixjunita.

Pus acsni tapasalh ju tam malhquiuyu' ju Labán k'elhtasunilhch ixtalhaja ju Jacob. Chai sacmilhch tijuch ju k'ox lhiulai ju calhimapalalh ixlacata ju ixlhich'alheat.

Pus ju Jacob junilh ni cach'alheatnaniyach ju lakatujun c'ata ni caxtaknilhch ju Raquel. Chai ju yuchi atsi' ix'amachakach canaviya'.

Pus ju Labán k'oxich lhiula ju chunch chivinti. Chai ju Jacob ch'alheatnanilhch ju lakatujun c'ata.

Pus ju acsnich ju Labán navilhch lakatam k'ai c'atan ixlacatach ju tamak'axt'ok'at. Para ju acsnich va okxchok'olh ju Jacob. Pus ju acsni ts'is Lea ju mak'axtaknilh ix'okxtapalhni ju Raquel. Para ju Jacob jantu c'atsa ju ixlacata ju chunch, tus alakatamch avilhchan ju lakts'ilh. Pus ixt'alakacujtach ju acsni atats'is ju Lea.

Pus ju acsnich vats'isin ju Jacob lhith'alak'ailich ju Labán. Para ju yuchi junilh ni jantu k'ox ni p'ulhnan catamak'axtoklh ju Raquel ni yuchi ju xalacat'icst'i. Pus yuchi ju Lea ju xak'ai chai yuchi ju p'ulhnan ca'icana'.

Pus ju acsnich ju Labán k'elhtasunilhch ju Jacob ni laich caxtaknilh ju Raquel para junilh ni cat'ach'alhcatnanchokolhch alakatujun c'ata.

Pus ju Jacob t'atamak'axtoklich vachu' ju Raquel. Chai ju Labán axtaknilhch ju pumatamin ix'atsi'in ju ixsqutininch catalacnaviya' ni xa'alac'icanch. Pus ju ixsquti' ju Lea ixjuncan Zilpa chai ju ixsquti' ju Raquel ixjuncan Bilha.

Ixtapaka'ut'an ju ists'alan ju Jacob

Pus ni mak'an ju ixpacxanta ju pumak'axtaknicalh ju ix'amachaka' ju Jacob, pus ju yuchi palai na ixmapaini ju Raquel, palai jantu ju Lea. Para ju Dios k'eu lakts'ilh ju Lea chai xtaknilh pumat'at'i ists'alan. Pus ju p'ulhnan ists'alh junicalh Rubén, ju ixlhipumat'ui Simeón, ju ixlhipumat'utu Leví chai ju ixlhipumat'at'i Judá.

Pus ju acsnich ju Raquel ni matich ixjunita ju is'ask'at'an, jantuch k'ox ixt'alalakts'in ju Lea. Chai junilhch ju Jacob ni cat'atamalhch ju ixsquti' juncan Bilha. Pus ju Jacob chunchach ju xanavi. Chai ju Bilha ak'ainalhch chai alilhch pumatam ists'alh. Chai ju Raquel lhimapaka'ulhch Dan. Pus ju Bilha alinchokopa apumatam ists'alh. Chai ju Raquel lhimapaka'ulhch Neftalí ju yuchi.

Pus acsni tsuculh ju Judá ixlhipumat'at'ich ists'alh ixtsucuta ju Lea, pus ju acsnich mak'anch va ju matich ix'ask'at'a ixjunita. Pus ixlhiyuchach lhijunilhch ju Jacob ni cat'atamalhch ju ixsquti' ju juncan Zilpa. Chai ju Zilpa ak'ainalhch chai alilh pumatam ists'alh. Pus ju yuchi ts'alh lhimapaka'ucalh Gad. Chai ju astanch alinchokolh apumatam. Pus talhimapaka'u Aser.

Pus ju ixlhi'astanch ni tsuculh ju Aser, ju Lea alinchokolh apumat'ui ists'alan. Pus ju pumatam lhimapaka'ucalh Isacar chai ju pumatam Zabulón. Chai vachu' alilh pumatam istsi' ju lhimapaka'u Dina.

Pus ju astan ni ixtapasak'otach ju ani taxtokni, pus ju Dios k'elhtailich ju ixchivinti ju Raquel. Pus ju yuchi ak'ainalhch chai alilhch pumatam ists'alh ju lhimapaka'u Ose.

**Ju Jacob alact'a'anchokoich
ju ixlapanacni ju Canaán**

Pus acsni ixt'ajunch ju Ose, ju Jacob ix'anchokopotunch alakts'ini' ju ixlhi'alak'avin. Pus ju yuchi t'alacchivinilh ju Labán ixlacata ju ixlhich'alheat. Chai sacmi tijuch ju lai calhimapalhnilh chux ju c'ata ju xat'ach'alheatnan.

Pus ju yuchi t'atak'oxilh ixlacata tijuch ju lai calhimapalhnilh. Para ju Labán vatach ix'okxchok'ot'ajunch ju Jacob.

Pus mas ni chunchach ju ixnavi, ju Dios vatach ixt'ajunch aklhtajunu' ju Jacob. Pus palai mak'ali' xanavi ju yuchi, palai jantu ju Labán.

Pus ju lakatam avilhchan ju Dios junilh ju Jacob ni va ts'alhtich ca'anchokolh ju la'ixt'un. Pus ju acsnich ju Jacob alacjunilhch ju ixlapanacni ni catatak'aixtoklich junta ixlachist'ac'a ju ixlac'atapacxat. Chai acsni tavananch tachink'ocha alacpumuc'alhch ju ists'alan chai ju ixlac'amachakanch ju lajcamellojni. Chai alaclhi'alhch ju la'ixt'un para jantuch taquimac'ami ju Labán.

Pus acsni tataxtulh ju Raquel lack'alhonilh ju lact'icst'i ixlacdios ju Labán. Pus va ixtanavin lapanac ixjunita ju ixlac'ak'ayai ju Labán. Para ju yuchi lana jantu tu'u' ixjunita ju Jacob ixlacata ju tuchi ixnavita.



Ju ixlapanacni ju Jacob alacpumuc'ai ju camellojni

Pus ju Labán c'atsalhch ni ix'antach ju Jacob chai lakts'ilh ni matich ixlacjunita ju ixlacdios. Pus ju acsnich lanach k'ox talhk'amalh. Chai taxtulhch ix'akch'ak'ok'axmaca ju Jacob. Pus alactaimayocha para jantu laclhitaju ju ixlacdios. Pus ju yuchi laddios va ixlacpuvi ju Raquel ju la'ix'ucxni ju xasilla ju camello ju ixtanun ju la'ixlonachaka' ju Raquel.

Pus ju acsnich ju Labán chai ju Jacob talamatank'oxamixilhch. Pus ju Labán anchokolhch ju la'ixchaka'. Chai ju Jacob tailhi'alhch ju ix'alhtanti ju xati Canaán.

Pus ju Jacob ixtitalhonica' ju ixlak'au Esaú. Pus acsni vaninch ixtacha'amputun alaclhvakpitsilhch ju ixlapanacni chai ju ixlac'atapacxat quilhmact'uich alacnavi. Chai sq'uinilhch ju Dios ni ca'aklhtaiju. Chai lana k'ox lhu ju ixlac'atapacxat ju alacsacstulh.

Pus sacstulh ju tentson, calhnilu, camellojni, vacaxni chai ju purrujni tach ju ixlhak'ailakts'intich navinilh ju Esaú. Chai ju yuchi lac'atapacxat alacmap'ulalhch. Pus ju yuchi pastaclhch ni chunchach ju laich capumatank'oxamixi ju Esaú.

Pus ju acsni atats'is alacmap'ulalhch ju ixlac'amachakan chai ju ists'alan. Para ju yuchi tamacaulich la'ixlhipulacan'an.

Ju Jacob t'alasai ju Dios

Pus ju acsni atats'is quilakquilachilh pumatam lapanac. Chai lana k'ox t'alasa. Para ju yuchi lapanac jantu lai lhajalh ju Jacob.

Pus acsni tsuculhch tuncunu' ju lapanac junilhch ju Jacob ni camoconilhch ix'anca. Pus ju Jacob junilh ni jantu catimoconilh ix'anca tus ni jantu k'elhtasuni ju a'aklhtaijunti. Pus ju acsnich ju lapanac junilhch ni camapaxaniya' ju ixtapaka'ut. Pus jantuch vana Jacob catijunicalh. Israelch cajuncana' ni va ixt'alasatach ju Dios.

Pus ixt'alasatach ju anu' lapanac chai ixt'alalhajatach. Pus ju acsnich ju Jacob lhisacmilhch ju ixtapaka'ut para ju yuchi jantu jumputulh. Para mas ni chunchach ju t'alalh, sq'uinilh k'ox is'atsucunti ju Jacob. Pus ju acsnich ju Jacob c'atsalhch ni Dios ju ixt'alasata. Chai yuchach ju ixtalacasunita tach tam lapanac.



Ju Jacob t'alsai ju Dios ju lacati

Ju Jacob t'alapakxt'ok'a ju Esaú

Pus ju Jacob k'ostavi chai tailhi'alh ju ix'alhtanti. Pus lakts'ilh ni ixmintach lak'apakxtoktaina' ju Esaú. Chai ju yuchi ixlhimintach ju lakat'at'i cientos lapanacni. Pus ju acsnich lana ats'ala'alh t'alalak'apakxtoknu'.

Pus lana k'ox talack'achalh ju ixt'iyun'an ni ixtalalakts'inchokotach. Chai lana k'ox talaclak'apuju. Chai ju Jacob alacmasunilhch ju Esaú ju ixlac'amachakan chai ju is'ask'at'an. Chai laclhijunilhch ju lac'atapacxat ju ixlacsacstutach ni calaclhek'ailakts'inach. Chai ju yuchi amaklhtayanalhch. Pus acsni talamocontilachokolhch ixtalamak'oxamixitach.

Pus ju acsnich ju Jacob alhch tolhna' ju lacalakatam lak'achak'an ju juncan Sucot. Chai tamaulh lakatam lacat'un ju laxalak'achak'an Siquem. Chai ju yuchi lacat'un tam cientos xatumin ju si plata lhitamaulh.

Pus ni palaich mak'an va, ju Dios junilh ju Jacob ni ca'alh tolhna' ju xalak'achak'an juncan Betel. Chai ju anch lacat'un canavinilhch lakatam ixpulak'ayacan. Pus acsni jantuca'

ixtaxtui, ju Jacob alacjunilh ju ixlapanacni ni catalakp'akx'ulak'o chux ju ixlacdios'an ju ixtapacxanta. Chai ju yu'unch talacmak'axtaknik'o ju Jacob chai ju yuchi lacmacnu.

Pus lanach ta'alh ju Betel. Chai anchach ju ixek'elata ju Dios ju la'ixlhtatat acsni ix'ats'alhnita ju Esaú. Pus ju Jacob navilhch lakatam ixpulak'ayacan ju Dios ju anch.

Pus acsni tataxtulh ju Betel, ju Raquel ix'ak'ainantach. Pus ju ask'at'a va lacatich ju tsuculh. Para ju Raquel nilh acsni ixt'ajun maklok'onu'. Chai ju Jacob lhimapaka'ulhch Benjamín ju ask'at'ats'alh. Chai va ixquilhtuch lacati ju macnu ju Raquel.

Chai ju astanch ju Jacob anchokolhch ju xalak'achak'an Hebrón. Pus anchach ju lhitajucha ju ixpai Isaac ni anchach ju ixtivilhchalhca'. Chai jantuch mak'an va nilhch ju Isaac. Pus ju Jacob chai ju Esaú yu'unchach ju tamacnu.

Pus ju Esaú alhch tolhna' ju lacalakatam lak'achak'an ju juncan Seir. Chai ju anch lacat'un na lacatalhpan ixjunita. Pus ju Canaán jantu na va alhek'ai ixjunita ju lacat'un ixlacata ju ixlac'atapacxat'an ju Jacob chai ju Esaú. Pus ju Esaú lana k'ox lhu alilh ju ixlac'apapanatni.

20. Ju Ose ists'alh ju Jacob lhi'ancalh ju Egipto chai k'ai ucxtin va

(maxtucanta ju lacaGénesis 37; 39–41)

Pus ju Jacob anch tolhk'alhilhch ju xalak'achak'an Canaán. Chai ju yuchi palai na ixmapaini ju Ose. Para ju ix'alak'avin lana k'ox ixtalhixcaji.

Pus ju Ose pakt'ui lhaklak'avanalh ni k'ai lapanac cajuna'. Chai ju ixlacata ju chunch aklak'avanti palaich na talhixcailh ju ix'alak'avin.

Pus ju lakatam avilhchan ju Jacob malakacha ju Ose junta ixtalhist'ac'acha ju ixlac'atapacxat'an ju ix'alak'avin. Pus ju Ose alh alakts'ini' tas ixtatalhitajuich ju ix'alak'avin. Pus acsni vaninch ix'antacha ju Ose, talakts'ilhch ju ix'alak'avin chai talaclajunilhch:

—Pus anuch mintacha ju na lhaklak'avanan ixt'ak'ayanti. Pus ca'auch makninin chai camujuyauch junta puculhucnic'a. Chai laich cajunau ju quimpai'an ni xa'atapacxat lacaq'uiivin ju xamakni.

Para ju Rubén, xak'ai ists'alh ju Jacob, naulh ni jantu catamakni. Pus ju acsnich vayuch ju tatai'inilhch ju ixpumpu'. Chai anch tamujulhch ju lacalakatam puculhucnic'a. Pus ni pants'iq'uis va, tatapasalh ju ast'anin ju ixta'anta Egipto. Chai ju acsnich ju Judá pastaclich ist'aca ju Ose tach tam tach'in. Chai ju yuchi alacjunilhch ju ali'in ix'alak'avin:

—Pus jantu tu'u' lhajayau ni va camakniu ju Ose. Pus ca palai k'ox calhixajcha ni va ca'alacst'aniuch ju ani ast'anin.

Pus talhitach'anxtamilhch ju ixst'aca ju Ose. Chai ju yuchi akxp'uxam ju xatumin ju si plata ju talhist'a.



*Ju ix'alak'avin ju Ose akxp'uxam ju xatumin
ju si plata talhist'a chai ju ts'uliu ixpumpu'
tamatsama ju ix'ac'alhni ju tentson*

Para ju Rubén jantu ixvi acsni tast'a ju Ose. Chai acsni chinchalhch alhch puxconu' ju Ose junta ixtamujutach lacapuculhucnic'a. Para jantuch lhitaju ni ixlhi'ancantach. Pus ju acsnich lanach k'ox amak'aninilh ju yuchi.

Pus ju acsnich ju ali'inch ix'alak'avin tasclich ju ixpumpu' ju Ose. Chai ju yuchi tamatsamalhch ju ix'ac'alhni ju tentson. Chai ta'alhch masuninin iu ixpai'an iu anu' dundu'.

Pus ju Jacob lana vatsalhti lak'amispa ni yuchi ju ixpumpu' ixjunita ju Ose. Chai pastaclich ni va ix'utach ju k'ai xamaktili' lacaq'uivin ju Ose. Pus ju yuchi lanach vas c'atsa ni va ixnitach ju Ose. Pus lana k'ox lhamak'animilh ju ists'alh. Pus ju ists'alan ixchux'an ixtamatank'oxajk'ayai. Para ju yuchi tailhi'alh ju ix'amak'anit.

Ju Ose Ihi'ancan ju Egipto

Pus ju ast'anin acsni tacha'alh ju Egipto tast'achokolh ju Ose. Pus ju yu'unch yuchi tast'anilh ju lapanac juncan Potifar. Chai ju yuchi lapanac xak'ai taropa ixjunita ju ixtalhist'ac'a ju xa'ucxtin Egipto.

Para mas va xalapanac ixjunita ju Ose, pus ju Dios vatach ixt'ajunch aklhtaijunu'. Pus chux ju la'ixlhich'alhcat ju tuchi ixnavi ix'aklhtaijuk'ojui.

Pus ju Potifar c'atsa ni na ixt'ajun aklhtaijunu' ju Dios ju Ose. Chai ju yuchi alacmalhistacnik'olhch chux ju ixlapanacni ju la'ixchaka'. Chai ju Dios tailhi'alh ix'aklhtaijuca ju Ose. Pus chux ju ixlhich'alhcat ju Potifar lana k'ox ixtailhi'anta ju la'ixchaka'.

Ju ix'amachaka' ju Potifar lakts'ilh ni na c'us ixjunita ju Ose

Para ju lakatam avilhchan ju ix'amachaka' ju Potifar lakts'ilh ni na c'us ixjunita ju Ose. Chai ju chako'ulh junilhch ju Ose ni cat'atamalhch. Para ju Ose junilh ni jantu lai catinavi ju chunch. Chai ni jantu k'ox catilhixajcha ni lai chunch canavi ju ix'ucxtin. Chai ju chunch vachu' na k'ai alactu'unti ju la'ix'ucxlacapu' ju Dios.

Para ju chako'ulh tailhi'alh ixjunica ni cat'atamalhch ju Ose. Ju lakatam avilhchan acsni va ixt'iyunch'an ju ixtatanumanalh ju lacachaka', ju chako'ulh ch'apanilh ju ixpumpu' ju Ose. Chai ju acsnich lana p'as ixak'alhi'amputun ni cat'atamalhch.

Para ju Ose lana jantu tu'u' ixnaviputun ju macxcai alactu'unti. Pus ju yuchi moconilhch ju ixpumpu' ju la'ixmaca' ju chako'ulh chai ats'alataxtulhch.

Pus ju acsnich ju ix'amachaka' ju Potifar lanach k'ox t'alatalhk'amnilh ju Ose. Chai ju acsnich naulich ni yuchi ju



*Ju ix'amachaka' ju Potifar p'as ch'apanilh ju
ixpumpu' ju Ose ni va ixt'atamaputunch*

Ose ju ixt'atamaputun ju chako'ulh. Chai ju yuchi chunch ju alacjunilhch ju ixtach'alhcatnan la'ixchaka'.

Pus acsni cha'anchokolhch ju Potifar ju la'ixchaka' vachuch chunch ju junilh. Pus ju Potifar quiclaca'ik'o chux ju tuchi junilh ju ix'amachaka'. Pus lanach k'ox t'alatalhk'amnilh ju Ose chai lhinaulich ixt'alhnuca.

Para mas ni chunchach ju xatapasai, ju Dios vatach ixt'ajunch aklhtaijunu' ju lacapulach'in. Chai ju ixlhista'acna' ju pulach'in lana k'ox lhamak'aninilh tach ju ixt'ajun tapasana' ju Ose. Pus ju yuchi malhistacnilhch ju ali'in tach'inin.

**Ju Ose alacmavasalani ju ix'aklak'avanti'an
ju ixlapanacni ju faraón**

Pus ju lakatam avilhchan ju xa'ucxtin Egipto alactalhk'amnilh ju xpumat'ui'an ixlapanacni. Chai anch alact'alhnu ju lacapulach'in junta ixlhista'ac'a ju Ose.

Pus ju pumatam ixlhiyu'unch yuchi ju ixnavini' ju ixkapavati ju faraón. Pus ju faraón va ixtapaka'ut ixta'ulani ju tam ucxtin. Chai ju pumatam yuchi ju ix'ini' ju ixlhek'ot'at ju la'ixcopa.

Pus ju lakatam atats'is lana jantu lai tamachakxa ju tuchi talhaklak'avanalh ju ixt'iyun'an. Para ju Dios aklhtaiju ju Ose ni lai ca'ajunilh ju tuchi ixnomputun ju ix'aklak'avanti'an.

Pus ju lapanac ju ix'ini' ju ixlhek'ot'at junilh ni camaxtuchokoya' ju lacapulach'in. Chai ju yuchi canavinichokoya' ju ixlhich'alhcat tach ju ixlhi'ap'ulhnan. Para ju ixnavini' ju xkapavat junilh ni va calhinona' ixmaknica ju faraón. Pus tach ju alacjunilh ju Ose, chunch ju uctaxtulh.

Para ju Ose ixjunita ju ix'ini' ju lhek'ot'at ni cat'achivinilh ju faraón ixlacata ju yuchi. Pus ju yuchi va ta'eklhtamat chivintich ju ixlhit'alhnucanta. Pus ju yuchi lapanac lakat'ui c'ata ju caplhi ju Ose.

Ju Dios maklak'avani ju faraón

Pus tus acsnich ju pastaclh ni alilhch ix'aklak'avanti ju faraón ju jantuch lai xamati' mavasalanilh.

Pus ju yuchi ixlhaklak'avananta lakatujun xalacxixni vacaxni ju ixtalac'ui ju na ixtalack'onta. Chai vachu' lakts'ilh k'elhtujun ix'axanat trigo ju na talacxixta ju ixtalac'ui ju lanach va lacxtacnic'a.

Pus ju acsnich vats'isin alact'asanilhch ju xa'alac'ulhtunin Egipto chai ju alakts'ijuninch. Pus ju yu'unch va alaclhit'asanilhch ni laich catajunilh tijuch ju nomputun ju ix'aklak'avanti. Para jantu xamati' ju lai machakxa ju anu' aklak'avanti.

Pus ju acsnich ju ixlapanac ju ix'ini' ju lhek'ot'at pastaclhch ju Ose. Pus junilhch tas ix'apumavasalanitach ju Ose ju ix'aklak'avanti'an ju yuchi chai ju ixnavini' xkapavat.

Pus ju faraón vats'alhti lhinaulh ixt'asanica ju Ose chai junilh ju ix'aklak'avanti. Pus ju Ose lhek'elhtailich:

—Pus ju tijt'ui min'aklak'avanti va tijtam lhamak'an ju nomputun. Pus ju Dios malacasuninch ju tuchi catapasaya' ju atipu'anta.

Pus ju lakatujun xalack'on vacaxni chai ju k'elhtujun lacxtacnic'a trigo va nomputun ni lakatujun c'ata ju na lhu

ca'alina' ju vaiti. Para ju lakatujun xaxixni vacax chai ju k'elhtujun xaxixni trigo va nomputun ni lakatujun c'ata ju ca'alina' ju mak'alk'ajna.

Pus ju p'ulhnan lakatujun c'ata lana k'ox lhu caxt'ak'a' ju xatoc'at ju lac'ach'ananti. Chai ju astanch camina' lakatujun c'ata ju lana jantu tu'u' catixtaklh ju xatoc'at ju ach'ananti.

Pus ni pakt'uich ju xalhaklak'avanan, ju chunch va nomputunch ni vasalh ca'uctaxtuya'.

Pus ju chavai ju uxint'i ju lai anavit'i yuchi ni ap'uxc'au pumatam lapanac ju na ca'ac'atsanalh. Pus ju yuchi lapanac va camak'alhch lakatamin ju xalakaquisin alhcanti ju xatoc'at ju ach'ananti ju tamin c'ata acsni na lhu ca'alina'. Chai ju yuchi vaiti anch camak'acanach ju laxapac'ats'a. Pus ju chunch ca'alinach ju ixvaiti'an ju amachak'an Egipto acsni cachina' ju c'ata pumak'alk'ajna.

**Ju Ose junlich ixlhipumat'ui
xa'ucxtin ju Egipto**

Pus ju faraón laca'ilhch ni na k'ox ju chunch atalacpast'ac'at. Pus ju yuchi lhca'ulalhch ju Ose ixpu'ucxtin. Pus chunch ju puvalhch ixlhipumat'ui ucxtin ju Ose ju xalak'achak'an Egipto. Chai vachu' ju faraón xtaknilh



Ju Ose mavalalai ju aklak'avanti

ix'amachaka' pumatam atsi' ju amachaka' Egipto. Pus ju faraón na k'ox t'alalhi'alh ju Ose.

Pus ju acsnich ju Ose ixpaxantach ju lakap'uxancau c'ata ju ixt'ak'ayanti. Pus ju yuchi chunchach ju xanavi tach ju ixpast'ac'ach. Chai mak'ak'olhch chux ju trigo ju ixajacha ju tamin c'ata. Pus lana k'ox lhu ju mak'a tach ju jantuch lai ixlhacac.

Pus acsni jantuca' ixtapasai ju lakatujun c'ata ju ix'amachaka' ju Ose ix'alinch pumat'ui ists'alan. Pus ju p'ulhnan tsuculh, ju Ose lhimapacutulh Manasés chai ju ixlhipumat'uich Efraín.

Acsni aclalh ju lakatujun c'ata, pus ju acsnich tai'ulalhch ju chavan ju Egipto. Chai vachuch tai'ula ju chavan ju lak'achak'anixnich ju vanin t'alanavita. Para va yuchi ju Egipto ju ixmak'atach ju vaiti. Chai lanach k'ox lhu lapanacni ju ixtamin tamonin ju vaiti ju Egipto. Chai ju yu'unch lapanacni vaclhunch lak'achak'anixni ju ixtaminacha ni ixlhilacaputs'unch ixjunita ju chavan.

21. Ju Ose tat'atak'aixt'ok'a ju ix'alak'avin

(maxtucanta ju lacaGénesis 42–45)

Ju ix'alak'avin ju Ose ta'an ju Egipto

Para ju acsnich ju Jacob ix'alact'avilhk'olhca' ju ists'alan ju xalak'achak'an Canaán. Para ju yu'unch ts'alan ix'alak'avin ixtajunita ju Ose. Pus ju k'ai chavan cha'alh ju anch lak'achak'an. Chai ju acsnich ju Jacob amalakachalhch ju ixpumacau'an xalajk'ajin ists'alan ju Egipto. Para ju yu'unch va ta'alhch tamonin ju vaiti.

Pus acsni tacha'alhch ju Egipto ta'alhch tamoninin ju trigo ju Ose. Pus ju yu'unch lana jantu tamispa tichi lapanacch ju ix'ast'anan. Para ju yuchi lana alacmispa chai lana k'ox p'as alacxek'ela.

Pus alacjunilh ni va atank'ajlakts'inin ixtajunita. Pus ju yu'unch tanaulh ni jantu ixtalhismanita ju chunch atsucunti. Para ju yuchi tailhi'alh ix'alacsacmica tas ixtajunitach ju ixpai, ixnati chai ju ix'ask'at'an. Chai alacjunilh ni jantu

cati'alajquiclaca'i tus ni jantu talhimin ju ixp'isek'e'an Benjamín.


Pus ju acsnich t'alhnulhch ju Simeón ju lacapulach'in. Chai ju ali'in alacmoconilhch ni cata'anchokolhch ju la'ixchaka'an. Pus alacxtaknilhch ju trigo ju ixtamintach inin. Para ju ixtumin'an ju ixtalhimapalhnitach alact'amunichokolhch ju la'ixlajcuxta'an. Pus ju yu'unch talac'anchokolhch ju Canaán.

Ju ix'alak'avin ju Ose ta'anchokoi ju Egipto

Acsni tamaca'ank'olhch ju trigo, pus ju Jacob ix'alacmalakachachokopotunch ju Egipto ixtamajuca ali'. Para jantu ixlacasq'uin ni ca'alact'a'alh ju Benjamín. Pus ju yuchi ixpast'ac'a ni va yuchach ju xalacat'icst'ich ixts'alh ju Raquel ju ixtitamacajunta. Pus ju ali'in ists'alan tanaulich ni jantu lai catita'alh ju Egipto ni jantu alact'a'anta ju Benjamín.

Pus ju acsnich naulich ju Judá ni yuchach ju calhist'ac'a'. Pus chunchach ju pumoconilhch ju Jacob ni ca'alact'a'alhch ju Benjamín. Chai alacjunilhch ni catamapalhchalhch ju p'ulhnanch ixtalhiminta ju trigo.

Pus axtaknichokolhch ali' tumin ju catalhitamochokoyantach ali' trigo. Chai alacxtaknilh ju



Ju Ose alact'avajin ju ix'alak'avin

lhak'ailakts'inti ju na laklhu ixtapalhni ni cataxtaknichalhch ju na p'as ix'alacxek'elata lapanac. Pus ju yuchi jantu ixc'atsai ni yuchi ju ists'alh.

Pus ju acsnich ta'ank'ochokolhch ixchux'an ju ixts'alan ju Jacob ju Egipto. Pus acsni alakts'istuclh ju Ose alacjunilhch ju ixlapanacni ni catalak'oxilhch ju vaiti.

Pus qui'ilhch ju Simeón chai alac'ulalhch ju lacamixa. Pus chunch ju alaclhilak'oxi'ulalhch tach ju ixtapupaktach. Chai p'ulhnanch ula ju xak'ai chai na astanch ju na xalacat'icst'ich. Pus ju yu'unch lanach k'ox ixta'amak'anininta ni va chunchach ju ix'alacnavita. Pus lana jantu ixtamachakxai tas ixpuc'atsaich ju ixc'ata'an.

**Ju la'ixcuxta ju Benjamín
Ihitajucan ju ixcopa ju Ose**

Pus ju yu'unch tat'availich ju Ose ju acsni avilhchan. Para ju yuchi junilh ju ixlapanac ni ca'alacmunichokolh ju ixtumin'an ju la'ixlajcuxta'an. Chai ju yuchi tumin yuchi ju ixtalac'himapalatach ju trigo. Para ju la'ixcuxta ju Benjamín cat'amuju ju pok'ot'a ju lhek'ot'at. Pus ju ixlapanac chunch ju xanavich tach ju xajunich.

Pus acsni pants'iq'uis tataxtulh, pus ju Ose junilh ju ixlapanac ni ca'alactaimayaulich. Chai ca'alacjunilh ni va tak'alhonita ju pok'ot'a ju lhek'ot'at ju Ose. Pus ju ix'alak'avin lana vas ixtac'atsai ni jantu va ixtak'alhonita. Pus ixlhiyuchach talhinaulh ni ixlapanacch cajuna' ju Ose ju calhitajunicanach ju copa.

Pus ju yuchi copa lana sok lhitajunicalh ju la'ixcuxta ju Benjamín. Pus ju acsnich lanach k'ox talhamak'aninilh ju yu'unch. Pus ju Jacob tus ixlhi'ap'ulhnan lana jantu ixmoconiputun ju Benjamín ni ca'alact'a'alh ju Egipto.

Pus ju acsnich ixchuxch'an ju ta'anchokolh ju la'ixchaka' ju Ose. Pus ju Ose lanach k'ox alac'ajk'aima. Chai p'asch alacjunilh ni ixlapanacch canaviya' ju Benjamín. Pus ju ali'in laich catalac'anchokolh ju la'ixlacchaka'an.

Pus ju acsnich ju Judá tapaininilhch ju Ose ni camoconilhch ix'anca ju Benjamín. Chai junilh tis ixlacatach ju ixlhisq'uini ni ca'alact'a'anchokolh junta ixvilhcha ju Jacob. Chai junilh ni ix'akstuch ju lai catamacaulh tach xalapanac



La'ixcuxta Benjamín lhitajunicalh ju xcopa ju Ose

ix'okxtapalhni ju Benjamín. Pus ju chunch jantuch palai na catimak'alhk'ajnalh ju ixpai'an.

**Ju Ose alacjuni ju ix'alak'avin
tis chavaich ixjunita**

Pus acsni xak'esmat'a ju Ose ju tuchi ixnajun ju Judá lana k'ox lhamak'aninilh. Chai alacjunilhch ju egipcionin ni catataxtok'o ixchux'an ju anch. Chai alacjunilhch ju ix'alak'avin ni yuchi ju Ose ixjunita. Chai alacmapast'ac'anilhch ju yu'unch ni va ixtast'ata tach tam xalapanac.

Para Dios ju ixlacasq'uinta ni laich chunch ju tanavi. Pus chunchach ju laich ixpumak'ata ju vaiti ju xalak'achak'an Egipto. Chai ju chunch jantuch na catamak'alhk'ajnana' ju ixchavan'an acsni ca'alina' ju chavan. Pus alacjunk'o tas ixpu'aklhtajutach ju Dios ni laich xajun xa'ucxtin ju Egipto.

Chai vachu' alacjunilh ni laich cata'anchokolh ju la'ixlacchaka'an chai ni catajunilhch ju ixpai'an Jacob ni ca'at'amink'olhch chux ju ixlapanacni. Chai ca'alaclhimink'olhch chux ju ixlac'atapacxat ju Egipto. Pus ju

anch laich ca'alac'aklhtaijuya' ju ixvaiti'an. Chai jantuch na catitamak'alhk'ajnalh ju lakaquis c'ata ju cati'alina' ju chavan.

Pus ju xak'ai ucxtin Egipto lana k'ox lhek'achalh acsni c'atsa ni ixtaquilata ju Egipto ju ix'alak'avin ju Ose. Chai na k'ox lhiula ni laich cata'alh tolhnin ju ixpai ju Ose ju Egipto. Pus ju yuchi alaclhijunilhch ju ixlacpalhtan ni laich catalacpu'alh. Pus ju ix'alak'avin ju Ose talac'anchokolh ju Canaán. Chai tajunilhch ju ixpai'an Jacob ni t'ajun ju Ose. Chai jantu va yuchi ni t'ajun, alai ucxtin junita ju Egipto.

22. Ju Jacob chai ju ists'alan ta'alh ju Egipto

(maxtucanta ju lacaGénesis 46–50)

Pus ju Jacob chai ju ists'alan ta'alh tolhnin ju Egipto. Chai acsni ixta'anta ju lacati talacmakni ju lac'atapacxat chai talhijunilh ju Dios. Pus ju anchach xek'elalhch ju Dios ju Jacob chai junilhch:

—Pus jantu at'alhan ix'anca ju Egipto. Pus na ac'aklhtaijutachan ju anch vachu'. Pus ju anch lana k'ox lhu cata'alinenta ju minlac'apapanatni. Chai ju yu'unch cataminchokoya' ju Canaán.

Pus ju acsni ju Jacob tailhi'alhch ju ix'alhtanti. Chai ju Jacob alacput'ek'elh ju ixts'alan, ix'apapanatni chai ju ixsuniya'apapanatni para jantu alaclhit'aput'ek'elh ju chakolun. Pus ju ixchux'an ju alaclhicha'alh ju Jacob ju Egipto sesenta y siete israelitanin.

Para ju Ose chai ju ixpumat'uich'an ists'alan ixtavilananchalhch ju anch. Pus ju ixchux'an ju tatavi ju Egipto setentach israelitanin tava.

Pus acsni cha'alhch ju Jacob alhch lakts'ini' ju xa'ucxtin Egipto. Pus ju ucxtin alacjunilhch ni laich catatavi ju lakatam xalak'achak'an Egipto junta juncan Gosén. Pus ju anch lacat'un na k'ox ixjunita ju ixlacata ju lac'atapacxat. Chai ju yu'unch anchach ju xata'an tolhnin.

Pus ju Ose lanach k'ox alac'aklhtaiju ju ixlacata ju ixvaiti'an. Chai ju anchach lak'achak'an ju is'ask'at'an ju Jacob chai ju ix'apapanatni na lhuch ix'ask'at'an'an talac'alilh.



*Ju Ose t'alalak'atanui ju
ixpai juncan Jacob*

Ju Jacob alacmatajtani ju ists'alan ju Ose.

Pus ju Jacob ixpacxantach tam cientos alakap'uxancau c'ata acsni alh ju Egipto. Chai ju anch lakacautujun c'ata ju titolhcha.

Pus acsni pastaclich ni ca va ts'alhtich caniya', t'asanilhch ju Ose. Chai junilh ni cak'elhtasunilh ni jantu catimacnu ju va xalak'achak'an Egipto. Pus junilhch ni anch ca'alhch macnunu' junta ixta'acnununch ju mak'aniya ixlacpa'itnich. Chai anch junta vilhch quiclhucucu talhpa ju juncan Macpela. Pus ju Ose chunchach ju lhik'elhtasunilh ju ixpai ni canaviya'.

Chai ju Ose alaclhi'anilhch ju pumat'ui ists'alan junta ixvi ju Jacob. Chai ju yu'unch ts'alan ix'alaclhimapacutucan Manasés chai Efraín. Pus ju Jacob junilh ju Ose ni ixk'elhtasunita ju Dios ni na lhu catajuna' ju ix'apapanatni. Chai ni vachu' ixjunita ni ca'alacmak'axtakniya' ju Canaán. Chai vachu' junilh ni ixlacasq'uin ni tach ju va ists'alanch ca'alacnaviya' ju Manasés chai ju Efraín. Pus ju chunch vachuch chunch ju catapaxana' ju ixlacat'un'an tach ju ali'inch ists'alan.

Chai lanach alaclacpach'apalh ju ists'alan ju Ose. Pus chunchach ju ixtanavi acsni ixtalacmap'aksi ju p'ulhnan. Pus ju Ose alacyaulich ju ists'alan ju la'ix'ucxlacapu' ju Jacob. Pus ju Manasés ni yuchi ju xak'aich yaulich ju la'ixlhicana chai ju Efraín la'ixlhimakxich ju yaulh.

Para ju Jacob va lapucurusli ju ixmaca'. Pus ju chunch ju ixlhicana mac'alh ju la'ix'aktsulh ju Efraín mas ni yuchach ju xalacat'icst'i ixjunita. Pus ju Jacob ixc'atsai ni palai na tachapun canaviya' ju Dios ju yuchi. Palai jantu ju ixlak'au.

Pus ju Jacob lhisq'uinihch ju Dios ni ca'alac'aklhtajulhch ju ixt'iyun'an. Chai junilh ju Efraín ni yuchi ju calhinona' la'ixmacni ju Manasés. Pus chunchach ju palaich k'ai lacat'un xa'apuxtakni ju ix'apapanatni ju Ose ju Jacob. Pus ju yuchi ists'alh yuchach ju palaich ixmapaini.

**Ju Jacob alacmatajtanich
ju ists'alanch ix'akstu**

Pus ju acsnich ju Jacob alact'asanik'olh ju ists'alan ju la'ixputaman. Chai alacjunilhch ju pumatamin ju tuchi catapasaya'.

Pus ju Rubén junilh ni jantu cati'amaklhtayanalh ju ixpuxak'ai tach ju xak'ai ts'alh. Pus ju yuchi va ixt'ama ju lakatam avilhchan ju ixnavin ju ixpai.

Pus ju Simeón chai ju Leví vachu' alacjunilh ni jantu na catitalact'ak'aya. Pus ju yu'unch ju lakatam avilhchan va ixtalacmaknik'ojuta ju xalapanacni ju lakatam lak'achak'an chai ju anch lak'achak'an jantu ix'alin tu'u' ju lai chunch catalhinavi.

Chai ju Judá junilh ni yuchach ju ca'alaclhijuna' ju ix'alak'avin. Pus ju Judá ixp'isek'e ixjunita ju Leví chai ixlak'au ju Zabolón.

Chai ju Zabolón junilh ni va ixquilhtu' laca'alama ju catsucuya'. Para ju Isacar junilh ni jantu catik'achanilh ix'anca ju alacatam lak'achak'an. Chai ju yuchi canaviya' ju na lacts'inq'ui lhich'alheat.

Para ju ix'apapanatni ju Dan catanaviya' lakatam lak'achak'an. Pus ju yu'unch lana jantu xamati' tu'u' cati'alaclhiula.

Chai ju Gad junicalh ni cat'alasacana' chai catai'inicana' ju ixlactaxtokni. Para ju yuchi ca'alactaimayochokoya' ju ak'alhonin. Chai ca'alactai'inichokoya' ju ixlactaxtokni.

Para ju Aser junilh ni na lhu capacxana' ju ixvaiti ju la'ixchaka'. Pus ixlhiyuchach ju yuchi na k'oxich calhivena'.

Para ju Neftalí chunch cajuna' tach ju k'ai venado ju va ucxunt'ajun ju lacaq'uivin.

Pus acsni lakcha'alhch ju Ose junilhch ni chunch cajuna' tach ju k'ai q'uiu ju na lhu xt'ak'a xatoc'at. Chai ju yuchi na ixtat'alasatach ju ix'alact'alaxcai. Para ju Dios ix'aklhtaijutach ix'alact'alalhajaca. Chai ju Dios catailhi'ana' ix'aklhtaijuca.

Chai ju Benjamín ju va yuchach ists'alh junilhch ni va titalhk'amani lapanacch cajunk'alhiya'.

Ix'aninti ju Jacob

Pus ju Jacob alacmap'aksik'olhch chux ju ixpumacaut'ui'an ists'alan. Chai alacmapast'ac'anilh ni anch ju ta'acnuputunacha ju xalactalhpa Macpela ju vilhcha Canaán.

Chai ni jantuch mak'an va nilhch ju Jacob, pus ju acsnich ju Ose alacjunilhch ju ixlapanacni ni catac'uch'ulhch ju ixlacatuna. Pus chux ju xalapanacni Egipto na talhamak'aninilh ju ix'aninti ju Jacob.

Chai ju Ose junilh ju faraón ni camoconilh ix'anca macnuca ju ixpai. Pus ju faraón moconilhch ni ca'alh. Chai ju Ose alact'a'alhch ju ix'alak'avin macnunu' ju ixpai ju laxalactalhpa Macpela. Pus ju Ose alact'acha'anchokolh ju ix'alak'avin ju Egipto.

Para ju chavai ju ix'alak'avin ju Ose na ixtatalhonich. Pus ju yu'unch ixtapast'ac'ach ni laich ca'alacmakni ni ixnitach ju ixpai'an. Pus chunch ju ixtapast'ac'ach ni va ixtast'atach tach tam tach'in ju ixlhi'ap'ulhnan.

Para ju Ose alacjunilh ni jantu catalactalhanalh. Pus ju yu'unch ixtapastactach ju palai macxcai ixlacata ju yuchi. Para Dios ju ixlak'oxik'ojuta chux ju tuchi catapasaya'. Pus ju amacxcai atsucunti lhimapaxalh ju k'ox. Pus chunchach ju laich ca'alacpumak'elhtaxtulh ju lapanacni ju c'ata ni ca'alina' ju chavan.

Pus ju acsnich tac'atsalhch ju yu'unch ni vasalhch ix'alacmac'acxanita ju Ose. Chai tatailhi'alh ju ixch'alhcatnat'an.



*Ju Ose lacjuni ju ix'alak'avin
ni jantu catalactalhanalh*

Ix'aninti ju Ose

Pus ju Ose ixpaxantach ju tam cientos alakacau c'ata ixt'ak'ayanti acsni xani. Pus acsni tuca' ixni alacmapast'ac'ani ju ix'alak'avin ni Dios ju ca'alac'aklhtajuya'. Chai ju yuchi ca'alaclhi'anchokoya' ju Canaán. Chai alacmak'elhtasuni ni catalaclhi'aniya' ju ixlac'alucutni acsni cata'ana' ju Canaán. Chai anchach ju catalacmacnuyanta.